

ASO LUA, 19 TESEMA 2017

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2017.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoao Faitulafono.

Ua saunoa le Afioga i le Sui Fofoga Fetalai i le fatia ua sola i lenei taeao e faapena ona momoli atu le faafetai ma le faamalo i le paia o le Kapeneta i lau Afioga i le Taitai o le Malo lau Afioga i le Palemia ma le Sui Palemia, e faapea foi le mamalu o le Palemene, aemaise foi o le auai mai o Lana Afioga Mamalu, O Le Ao o le Malo faapea le Sui o le Fono a Sui Tofia, aemaise foi o le Aufaigaluega Paia a le Atua ma le mamalu o le auvalaaulia. O le paia lava lea aua Aiga ma Tama, o Tama ma Aiga, o le Usoga a Tumua ma Pule, o Ituau ma Alataua, Aiga i le Tai ma le Vaa o Fonoti.

E i ai le manatu, ia o le leo foi lena o le Nofoa e faafetaia ai lenei taeao i le tatou uluai fono foi o lenei masina, ma o le fono faaii foi o lenei tausaga.

E avea foi le leo e faatalofa atu ai ma le agaga faaaloalo, aua le faafofoga tapuai mai a lo tatou atunuu ia Samoa, e amata mai i ona Ao seia oo lava i ona lu.

Mo le silafia e le Maota ua nofoia nei le nofoaga mo tagata lautele e sui auai o le Polokalame Faa-Palemene mo Faalapotopotoga mo Tagata Lautele, Civil Society 2017. E le toe tau faalauiloaina, o nei Polokalame e auga lava i le faalauiloaina atu o matafaioi ma galuega fai a le Palemene mo le silafia e le atunuu lautele.

E avea ai lou leo e fai ma sui o le Palemene mamalu e faatalofa atu ai i lo outou mamalu. Tau ia ina ia alofagia e le Atua tualumaga uma o lo o outou faamoemoe i le aso.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

*19 TESEMA 2017***Malelega mai Le Ao o le Malo**

E tusa ai ma le Mataupu 59 o le Faavae o le Malo Tuatoatasi o Samoa, ua ou tuuina atu nei le maliega i le Fono Aoao Faitulafono na te iloiloaina ai ia Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.1) 2017/2018.
2. Tulafono Tau Faaofi o Teuteuga o le Tulafono o le Faafoga o Kasino ma Taaloga Eeseese Tau Tupe (Nu.2) 2017.
3. Tulafono Tau Faaofi o le Faletupe o Asia mo Atinae Tetele ma le Faafaigalugaina o Tupe 2017.
4. Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017.

TUUINA ATU i lou nei Lima i lenei aso 18 Tesema 2017.

(Sainia): **TUIMALEALIIFANO VAALETOA SUALAUVI II
O LE AO O LE MALO.**

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene, ua tuuina atu nei le Faaaliga i le Fono Aoao Faitulafono mo le iloiloaina o Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o le Faaliliuina o Fanua Faale-aganuu 2017.
2. Tulafono Tau Faaofi o Teuteuga o le Tulafono o Solitulafono 2017.
3. Tulafono Tau Faaofi o Teuteuga o le Tulafono o le Ulufale Mai o Tagata 2017.

TUUINA ATU i lenei aso 18 Tesema i le tausaga 2017.

(Sainia): **Hon. TUILAEPA Auelua Fatialofa Lupesoliai
Lolofietele Aiono Neioti Galumalemana Dr. Sailele
Malielegaoi.
TAITAI O LE MAOTA.**

19 TESEMA 2017

FAAALIGA MAI LE TAITAI O LE MAOTA

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa Faitulafono mo le iloiloaina o Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Solitulafono 2017.
2. Tulafono Tau Faaofi o Teuteuga o le Tulafono o le Ulufale mai o Tagata 2017.
3. Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017.
4. Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017.

TUUINA ATU i lenei aso 18 Tesema i le tausaga 2017.

(Sainia): Hon. TUILAEPA Auelua Fatialofa Lupesoliai
Lolofietele Aiono Neioti Galumalemana Dr. Sailele
Malielegaoi.

TAITAI O LE MAOTA.

TUUINA ATU O PEPA

Na tolaulau e le Failautusi Pepa nei ua faataatia i luga o le Laulau a Fono, e tusa ai ma T.T.49.

1. S.R. 2017/9, Tulafono Faatonutonu o Taumafa (Saogalemu ma le Tulaga Aupito Manaomia) 2017.
2. P.P. 2017/2018 Nu.106, Lipoti Faaletausaga a le Auaunaga o Falepuipui ma le Toefuataiga Ianuari-Juni 2014 & 2015/2016.
3. P.P. 2017/2018 Nu.108, Lipoti Faaletausaga a le Ofisa Fuainumera Faamauina a Samoa 2015/2016.
4. P.P. 2017/2018 Nu.114, Lipoti Faaletausaga a le Faalapotopotoga Faavae Tau Fatugao o Samoa 2017.
5. P.P. 2017/2018 Nu.115, Lipoti Faaletausaga a le Faalapotopotoga Malosi Faaletise 2015-2016.

19 TESEMA 2017

TUUINA ATU O LIPOTI A KOMITI FAA-PALEMENE

Na tolaulau e le Failautusi le Lipoti leni ua faataatia e tusa ai ma le T.T.52(5).

1. P.P. 2017/2018 Nu. 109, Lipoti a le Komiti o Tupe Maua ma Tupe Totogi i le Tulafono Tau Faaofi o le Faafoga o Taaloga Eeseese Tau Tupe 2017.

LAFO A TAITAIFONO A KOMITI FAA-PALEMENE E TUSA AI MA TULAFONO TUMAU 45

FOFOGA FETALAI: Ou te tapa lau Afioga i le Sui Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

Tofa NAFOITOA TALAIMANU KETI (Sui Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloilo ina ai Galuega e 3 ua taua i lalo, na tuuina mai i leni Komiti, ona e le i maea atoatoa i ai ana iloilo, ma lipoti mai ai i le Fono Aoao i le Fonotaga e sosoo ai.*

Na motusia Taulumaga a le Fono Aoao Faitulafono i le itula e 9:20 i le taeao ona o se faaletonu tau masini o alaleo ma toe faaauau ai i le itula e 9:36 i le taeao ina ua maea ona toe faaleleia.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoao Faitulafono.

E faamalulu atu i le paia o le Palemene ae faapea foi le faafoga tapuai mai a Samoa ona o tulaga faaletonu o tatou masini. E ui o lea, o lea ua toe faaleleia.

Sa tapa ma le faaaloalo lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae, e tulai mai ina ia toe faaopoopo e tuuina atu se Faatagaga e faaopoopo ai le taimi e iloilo ai Galuega e 3 ua taua i lalo.

1. Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017.
2. P.P. 2016/2017 Nu.137, Lipoti i le Palemene o Galuega a le Ofisa Suetusi Iulai 2012-Iuni 2013.
3. P.P. 2016/2017 Nu.138, Lipoti a le Suetusi Sili i le Fono Aoao Faitulafono i Luga o Galuega a le Ofisa Suetusi o Samoa 1 Iulai 2013-30 Iuni 2014.

19 TESEMA 2017

**Lafo a Taitaifono a Komiti Faa-Palemene e tusa ai ma
Tulafono Tumau 45**

4. P.P. 2016/2017 Nu.153, Lipoti a le Pule ma Suetusi Sili i le Fono Aoaofaitulafono, i luga o Galuega a le Ofisa Suetusi Sili Samoa mo le Tausaga Faaletupe, 1 Iulai 2014-30 Iuni 2015.

Faaluaaina e le sui usufono mo Falealili Sasae ma le Sui Fofoga Fetalai.

Na faamaonia le lafo.

FOFOGA FETALAI: Ou te tapa lau Afioga i le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU (Taitaifono o le Komiti o Tupe Maua ma Tupe Totogi): E faatalofa atu i lau Afioga i le Fofoga Fetalai, o sui usufono mamalu o le Palemene, ae faapea Samoa ua potopoto mai, ae le gata i lea a o le tapuaiga a lou itumalo o Alataua Sisifo.

Lau Afioga i le Fofoga Fetalai ou te faatu le lafo, *Ina ia tuuina mai e le Fono Aoaofaitulafono se faatagaga e faaopoopo ai le taimi e iloiloaina ai le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017, na tuuina mai i lenei Komiti, ona e le i maea atoatoa i ai ana iloiloa, ma lipoti mai ai i le Fono Aoaofaitulafono i le Fonotaga e sosoo ai.*

Faaluaaina e le sui usufono mo Palauli le Falefa.

Na faamaonia le lafo.

FOFOGA FETALAI: Ou te tapa se tasi o Sui o le Komiti o le Vaega Tau Le Va Fealoai.

Tofa AUMUA ISAIA LAMEKO (Sui Usufono o le Komiti o le Vaega Tau Le Va Fealoai): Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoaofaitulafono se faatagaga e faaopoopo ai le taimi e iloiloaina ai le S.R. 2017/5, Tulafono Faatonutonu o Teuteuga o Tulafono Faatonutonu o Galuega Tau Leoleo 2017, na tuuina mai i lenei Komiti, ona e le i maea atoatoa i ai ana iloiloa, ma lipoti mai ai i le Fono Aoaofaitulafono i le Fonotaga e sosoo ai.*

Faaluaaina e le sui usufono mo Vaimauga Sasae.

Na faamaonia le lafo.

FOFOGA FETALAI: Ou te tapa lau Afioga i le Taitaifono o le Komiti o le Vaega Tau Le Tamaoaiga.

19 TESEMA 2017

**Tulafono Tau Faaofi o le Faatatauina o Tupe Faaopoopo (Nu.1)
2017/2018 – faitauga muamua**

Tofa Hon LAUOFO FONOTOE NUAFESILI PIERRE LAUOFO (Taitaifono o le Komiti o le Vaega Tau Le Tamaoaiga): Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoa se Faatagaga e faaopoopo ai le taimi e iloiloina ai le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017, na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoa i le Fonotaga e sosoo ai.*

Faaluaina e le sui usufono mo Siumu ma le sui usufono mo Vaimauga Sasae.

Na faamaonia le lafo.

FOFOGA FETALAI: Ma lou faaaloalo, ou te tapa le Afioga i le Taitaifono o le Komiti o le Vaega o Atinae Eseese.

Afioga TAFUA MALUELUE TAFUA (Taitaifono o le Komiti o le Vaega o Atinae Eseese): Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoa se Faatagaga e faaopoopo ai le taimi e iloiloina ai le S.R. 2017/7, Tulafono Faatonutonu o Tagata Tomai Faainisinia (Faamauina) 2017, na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoa i le Fonotaga e sosoo ai.*

Faaluaina e le sui usufono mo Anoamaa Sisifo.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2017/2018 – faitauga muamua**

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2017/2018 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Faamasinoga ma Pulega Tau Faamasinoga, ma le Minisita mo Fesootaiga, Faamatalaga ma Fesootaiga Vavave Faaneionapo.

Na faamaonia le lafo ma faitauina le Tulafono Tau Faaofi i lona faitauga muamua.

19 TESEMA 2017

TALA FAATATAU O TUPE FAAOPOOPO (NU.1) 2017/2018
 – faataatia i luga o le Laulau a Fono

Na faataatia i luga o le Laulau a Fono e le Afioga Hon Sili Epa Tuioti, Minisita o Tupe le Tala Faatatau o Tupe Faaopoopo (Nu.1) 2017/2018.

TULAFONO TAU FAAOFI O LE FAATATAUINA O TUPE
FAAOPOOPO (NU.1) 2017/2018 – lafo mo le faitauga faalua

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2017/2018 i lona faitauga faalua.*

Faalua e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Tupe Maua, Minisita mo Faamasinoga ma Pulega Tau Faamasinoga, ma le Minisita mo Fesootaiga, Faamatalaga ma Fesootaiga Vavave Faaneionapo.

SAUNOAGA O LE TALA FAATATAU FAAOPOOPO MUAMUA O
LE TUPE 2017/2018

Afioga Hon SILI EPA TUIOTI: Lau Afioga i le Fofoga Fetalai ma le mamalu o le Palemene, e ia te au le ava ma le faaaloalo tele, e avea ai au ma Sui o le Malo, e tuuina atu i luma o le Laulau a Fono a le Palemene le Tala Faatatau Faaopoopo Muamua o le Tupe 2017/2018.

Lau Afioga i le Fofoga Fetalai, o le Tala Faaopoopo o le Tupe o lo o faaauauina pea i lalo o le sini autu o le “*Agava'a Tutusa ma le Talafeagai.*” O le naunautaiga ina ia faatumauiina pea i totonu o le 3.5% o le tamaoaiga le faasiliga o tupe alu a le Malo nai lo ana tupe maua. I le taumafai ai pea ina ia ausia lenei tapulaa, o lea ua mafai ai ona faatupeina uma talosaga i lalo o lenei Tala Faaopoopo o le Tupe mai tupe maua ua mafai ona faamausaliina faatasi ai ma le toe fetuunaiga o nisi o tupe faasao e aunoa ma le manaomia o ni nonogatupe fou a le Malo o Samoa ma ua mafai ai ona faatumauiina le faasiliga o tupe alu pe a faatusatusa i tupe maua o lo o i ai nei.

Ou te fiafia lava e faailoa atu o lo o faaauauina pea le faatupulaia o le tatou tamaoaiga lea sa faamauiina se siitaga e tusa ma le 2.4% i le tausaga faaletupe 2016/2017. O lenei tulaga sa mafai ona ausia ona o le maualuga o le faatupulaia o atinae i vaega tumaoti o Pisinisi, Faatoaga, Auaunaga Eesese faatasi ai ma le Vaega mo le Gaosiaina o Oloa.

Ou te fiafia foi e faailoa atu ua maea nei le iloiloaina o le Tala i le Tupe 2016/2017 ma ua faamauiina ai le na o le 2.1% o le tamaoaiga le faasiliga o tupe alu a le Malo nai lo tupe maua – ua faaititia mai lea i le tapulaa sa faatulagaina e 3.5%. O lenei tulaga sa mafai ona ausia ona o le tulaga maualuga sa tulai mai ai tupe maua a le Malo e 3.7% sa siitia ai pe a faatusatusa i le tausaga 2015/2016. E 3.3% sa siitia ai ia tulaga o tupe maua mai lafoga ae 1.1% o le faatupulaiga o tupe maua mai isi auaunaga a le Malo.

19 TESEMA 2017

**Saunoaga o le Tala Faatatau Faaopoopo Muamua o le Tupe
2017/2018**

E le gata i lea, sa faamauina foi le faaauuina pea ona tuutiitia tupe faaalu a le Malo ma ua tolu tausaga sosoo o tulai mai pea lea tulaga.

O lo o faaauuina pea le ave o le faamuamua a le Malo i le faatinoina o atinae po o poloketi tetele e aofia ai le toe faaleleia o fale e faaee ma faatali ai pasese ma le faaleleia atili o le malae vaalele i Faleolo mo le saogalemu o femalagaiga, faapea le fausiaina o auala ma auala laupapa, ala o fesootaiga fou faatasi ai ma fale e gaosi ai le eletise e faaoga ai le suavai ma o ni atinae e mafai ai pea ona siitia i se tulaga maualuga ma lelei ia auunaga o lo o manaomia e le lautele o le atunuu.

Lau Afioga i le Fofoga Fetalai, o leni taunuuga uma o lo o atagia mai ai le faiga pulega lelei o lo o vaavaaia ma pulea o tatou aseta ma atinae a le Malo faatasi ai ma le galulue faatasi o ofisa ma matagaluega uma a le Malo auā le siitia o auunaga mo le atunuu i se tulaga lelei.

Tala Faatatau Faaopoopo Muamua o le Tupe

Lau Afioga i le Fofoga Fetalai, o se oototoga leni o vaega tāua o leni Tala Faatatau Faaopoopo Muamua o le Tupe mo le tausaga faaletupe 2017/2018 mo le silafia e sui usufono mamalu Kapeneta o le Palemene.

O le aotelega o tupe alu faaopoopo o lo o faatalosagaina i lalo o le Tala Faatatau leni e tusa lea ma le \$24.4miliona. O nei tupe alu o le a mafai ona faatupeina lea mai faasiliga i tupe maua faatasi ai ma tupe maua faaopoopo e tusa ma le \$23miliona, faaopoopo i ai ma le toe fetuunaiga o tupe faasao o lo o i ai e tusa ma le \$1.4miliona.

Aotelega o Tupe Maua:

O tupe faaopoopo e tusa lea ma le \$23miliona ma e auiliilina atu e faapea:

- **\$12.75miliona o tupe faameaalofa mai fafo** ua mafai ona faatupeina lea mai i le tatou faiga paaga ma le Faletupe a le Lalolagi le World Bank i lalo o se polokalame tuufaatasi ma isi a tatou paaga masani. Ua ausia uma e le Malo o Samoa taunuuga moomia i lalo o leni polokalame ma ua mafai ai loa ona faamatuu mai leni vaegatupe e fesoasoani ai i le Tala o le Tupe a le tatou Malo;
- **\$9.6miliona** se faasiliga o lo o i ai i tupe toe totogi mai e faalapotopotoga a le Malo i luga o nonogatupe o lo o totogi e le Matagaluega o Tupe;
- **\$688,957** se vaegatupe o le a maua mai i lafoga ona o tupe alu faaopoopo e pei ona faatalosagaina e Matagaluega;

O tupe faasao po o tupe alu o le a toe fetuunai e tusa lea ma le \$1.4miliona ma e aofia ai vaega nei:

- *\$481,000 mai Tupe Alu Faaletulafono*

19 TESEMA 2017

**Saunoaga o le Tala Faatatau Faaopoopo Muamua o le Tupe
2017/2018**

- O nei vaegatupe o tupe faasao mai tupe faaagaga mo fesuiaiga i tau o tupe mai fafo; po o tulaga ia o Foreign Exchange Savings;
- ***\$100,000 e maua mai i le Matagaluega o Faatoaga***
 - O lenei vaegatupe na totoe mai i le faatinoina o le Faaaliga a le Aufaifaatoaga sa faatinoina lea i le masina o Oketopa ma ua finagalo le Kapeneta e toe fetuunai mo nisi polokalame o tupe faaalu;
- ***\$696,024 mai i le Matagaluega o Pisinisi, Alamanuia ma Leipa***
 - O lenei vaegatupe sa faaagaaga mo le totogiina o le lisi o le fale sa faaaogaina e le Yazaki, e pei ona silafia e le Palemene ma le tatou atunuu, ua faapea ona faamuta le galuega a le Yazaki ma ua mafai nei ona toe fetuunai le tapuni aloaia ai o lenei kamupani ma ua maua ai le vaegatupe ua faasaoina;
- ***\$152,085 mai le Matagaluega a le Palemia ma le Kapeneta;***
 - O le aotelega o nei tupe e mai totogi o avanoa ua tuuina mai e le Matagaluega e toe fetuunai ina ia mafai ai ona faatupe ni avanoa ua ave i ai le faatauaina mo lenei Tausaga Faaletupe o lo o faagasolo nei ma ua tuuina i totonu o le Tala o le Tupe e pei ona taatia i le Laulau a Fono;

Aotelega o Tupe Alu:

E pei ona faailoa muamua atu, o le aotelega o tupe alu faaopoopo o lo o faatalosagaina e tusa lea ma le \$24.4miliona ma e aofia ai vaega nei:

- ***\$12.4miliona mo Tupe Alu Faaletulafono***
 - \$14,400 mo alauni o telefoni mo nisi o sui o le Faamasinoga o lo o lavevea i totonu o konekarate o Faamasino e pei ona faatulafonoina, ma o le a aofia i o latou totogi masani;
 - \$65,089 se vaegatupe faaopoopo mo le totogiina o tului mo ni nonogatupe ma faalapotopotoga mai fafo;
 - \$2miliona o le a faaopoopo i luga o tupe toe faaola i luga o lafoga o tupe maua;
 - \$3miliona o le a tuuina atu mo tupe toe faaola mo tiute tuusaunoaina;
 - \$7.35miliona e faaopoopo i luga o tupe toe faaola i luga o lafoga masani.

19 TESEMA 2017

**Saunoaga o le Tala Faatatau Faaopoopo Muamua o le Tupe
2017/2018**

- **\$102,915 mo le Matagaluega o Pisinisi, Alamanuia ma Leipa**
 - \$20,915 o se vaegatupe lea o lo o manaomia mo le totogi o se avanoa o lo o manaomia tele e le Matagaluega (*Principal Human Resource Officer*);
 - \$82,000 e faatupe ai se taavale o lo o moomia auā le faatinoina o auunaga masani a le Matagaluega.

- **\$700,000 le vaegatupe ua faaagaaga mo le Matagaluega o Aoga;**
 - \$500,000 o le vaega ia e faaagaaga mo totogi o faiaoga;
 - \$200,000 e faaatoa ai penefiti masani mo faiaoga;

- **\$5.66miliona mo le Matagaluega o Tupe; o lea vaegatupe ua vaevaeina e faapenei;**
 - \$2.55miliona le tupe faaopoopo mo tupe faaagaga e totogi ai tiute mo oloa auina mai fafo aua atinae tetele ma poloketi faatino a le Malo o Samoa; o atinae ia o lo o faatupe mai e a tatou paaga mai fafo, o le mea e masani ai e totogi e le Malo le VAGST ia ma tiute o ia oloa;
 - \$2.55miliona le tupe faaopoopo mo le totogiina o lafoga masani i luga o oloa o lo o faaagaina mo le faatinoga o atinae tetele ma poloketi a le Malo;
 - \$50,000 se vaegatupe e fai ma sao a le Malo i le atinaeina o le tatou *Apia Waterfront Development*; pei ona silafia o lenei atinae o le faaleleia o le taulaga o lo o fesoasoani mai i ai le Malo o Niu Sila;
 - \$20,000 se vaegatupe faaagaaga mo le sao a le Malo i le atinae lea o le *Disaster Risk Management*;
 - \$40,000 o se vaegatupe faaagaaga mo le sao a le Malo e lagolago atu i galuega o lo o faatinoina e le *UNFPA Multi Agreement*;
 - \$10,000 o se vaegatupe lea ua faaagaaga mo le sao a le Malo e lagolago ai pea le Komiti Faufautua i le faaagaina o Fanua Faaleaganuu po o le *Customary Land Advisory Commission*;
 - \$150,000 se vaegatupe e faaopoopo i le sao a le Malo mo le toe faaleleia lea o le auala i le malae vaalele e puipuia ai mai aafiaga o fesuaiga o le tau; *Enhancing Resilience of West Coast Road Project*;
 - \$290,000 ua faaagaaga mo le faatupeina lea o le uluai vaegatupe e tatau ona totogi atu i le Pacific Games Council, o latou ia o lo o latou vaaia ma pulea ia tulaga ia o Taaloga foi ia a le Pasefika.

19 TESEMA 2017

**Saunoaga o le Tala Faatatau Faaopoopo Muamua o le Tupe
2017/2018**

O lea vaegatupe o se vaega muamua e tatau ona totogi e lo tatou Malo i le tatou atunuu, o tatou lea na tatou Host ina Taaloga o le 2019, o le \$290,000 lea o le tupe muamua lea e tatau ona totogi atu i le Council lea e tusa ai ma aiaiga ua uma ona sainia;

- **\$60,270 mo le Matagaluega o Faamasinoga**
 - \$60,270 o se vaegatupe lea e fesoasoani ai i le faatumuina le faatupeina o se tasi o avanoa faigaluega ua manaomia vave e le Matagaluega; (*Judicial Research Analyst/Consultant*);
- **\$5.2miliona mo le Matagaluega o Falepuipui**
 - \$3.7miliona se vaegatupe e faauma ai le totogiina o le konekarate mo le fausiaina o fale mo pagota i Tanumalala; \$1.5miliona e faatupe ai le fausiaina o ofisa tutotonu ma nisi o auaunaga moomia mo le falepuipui fou;
- **\$144,539 mo le Matagaluega a le Palemia ma le Kapeneta**
 - o lenei vaegatupe o lo o moomia mo ni avanoa faigaluega o lo o faatalosagaina o lo o manaomia e fesoasoani i le faaleleia atili o le auaunaga a lenei Matagaluega;
- **\$131,000 mo le Pulega o Galuega Tineimā**
 - \$131,000 o lenei vaegatupe ua manaomia e totogi ai nisi o tagata faigaluega e latou te faatinoina le auaunaga fou lea ua fesui ai a tatou numera foi ia o le 994, 995 i tulaga tau pe a i ai ni emergencies, a o lea ua tasi i le 911, e manaomia le i ai o nisi e faafaigaluega e faatinoina lenei fesuiaga;

Upu Faaiu

Lau Afioga i le Fofoga Fetalai ma le mamalu o le Palemene, o le Tala Faaopoopo ua folasia i le Maota i lenei taeao, o le taunuuga lea o galuega fai auā le naunautaga ina ia mausalī le atinae o le atunuu faatasi ai foi ma le maunoina ia i ai ni vaega faaopoopo auā lava auaunaga masani mo le mamalu lautele o le atunuu. O le a tulimatai pea e le Malo le faasoa tatau o vaegatupe [uma ina ia siitia le soifua manuia o o tatou tagatanuu.](#)

Lau Afioga i le Fofoga Fetalai ma le mamalu o le Fono, avea ia au e fai ma Sui o le Malo, e momoli atu ai alofaaga ma faamanuiaga i lau Afioga i le Fofoga Fetalai ma le mamalu o le Palemene, aemaise le tapuaiga a Samoa, ina ia o tatou maua uma se Kerisimasi fiafia ma le filemu aemaise se Tausaga fou manuia.

*19 TESEMA 2017***Tulafono Tau Faaofi o Teuteuga o le Tulafono o le Tulafono o le Ulufale mai o Tagata 2017 – faitauga muamua**

O le avanoa foi lenei e momoli atu ai le faamalo ma le faafetai i le tapuaiga a lou itumalo o Faasaleleaga Nu.1 Sasae. Malo tapuai, malo lagolago. Soifua.

FOFOGA FETALAI: Malo faafetai mo le saunoaga a le Minisita o Tupe. E tusa ai ma Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe Faaopopo (Nu.1) 2017/2018 e le itiiti ifo i le 14 aso, a o tuuina atu le Tala Faatatau o Tupe Faaopopo (nu.1) 2017/2018 i le Komiti o Tupe Maua ma Tupe Totogi mo le iloiloina, ma toe lipoti mai i le Fono Aoao.

TULAFONO TAU FAAOFI O TEUTEUGA O LE TULAFONO O LE ULUFALE MAI O TAGATA 2017 – faitauga muamua

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ou te tulai atu ma le agaga faaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ulufale Mai o Tagata 2017 i lona faitauga muamua.*

Faaluaina e le Minisita mo Pisinisi ma Alamanuia, ma le Sui Palemia.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O TEUTEUGA O LE TULAFONO O SOLITULAFONO 2017 - faitauga muamua

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Solitulafono 2017 i lona faitauga muamua.*

Faaluaina e le Minisita mo Aoga, Taaloga ma Aganuu, ma le Minisita mo Fesootaiga, Faamatalaga ma Fesootaiga Vavave Faaneionapo.

Na faamaonia le lafo ma faitauina le Tulafono Tau Faaofi i lona faitauga muamua.

19 TESEMA 2017

**TULAFONO TAU FAAOFI O TEUTEUGA O LE TULAFONO O
KASINO MA LE FAAFOEGA O TAALOGA TAU TUPE ESEESE
(NU.2) 2017 – faitauga muamua**

Afioga Hon LAUTAFI FIO SELAFI PURCELL (Minisita mo Faalapotopotoga Tumaoti a le Malo): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Kasino ma le Faafoega o Taaloga Tau Tupe Eseese (Nu.2) 2017 i lona faitauga muamua.*

Faaluaina e le Minisita mo le Soifua Maloloina, Minisita mo Tagata Tafafao Maimoa Mai Fafo, ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FAALILIUINA O FANUA FAALE-AGANUU 2017 – faitauga muamua**

Afioga Hon FIAME NAOMI MATAAFA (Minisita mo Punaoa Faalenatura ma le Siosiomaga): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaliliuina o Fanua Faale-aganuu 2017 i lona faitauga muamua.*

Faaluaina e le Minisita mo le Soifua Maloloina, ma le Minisita mo Pisinisi ma Alamanuia.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE FALETUPE O ASIA MO ATINAE
TETELE MA LE FAAFAIGALUEGAINA O TUPE 2017
– faitauga muamua**

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 i lona faitauga muamua.*

Faaluaina e le Minisita mo Aoga, Taaloga ma Aganuu, Minisita mo Faamasinoga ma Pulega Tau Faamasinoga, ma le Minisita mo Tina ma Tamaitai, Atinae o Nu'u, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

19 TESEMA 2017

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA (NU.2) 2017 – faitauga muamua**

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga muamua.*

Faaluuina e le Minisita o Tupe, Minisita mo Galuega, Felauaiga ma Atinae Eeseese ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
ULUFALE MAI O TAGATA 2017 – faitauga faalua**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoao mo le faitauga faalua o le Tulafono Tau Faaofi.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ulufale Mai o Tagata 2017 i lona faitauga faalua, ma ou te fia tautala faamalalama i ai.*

Faaluuina e le Sui Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai e tulai atu ma le faaaloalo e fai sina faamatalaga, o le tamai Tulafono e le o se Tulafono lapoa. E teuteuina ai le Tulafono mo le Ulufale Mai o Tagata.

O le aso ananafi sa faamalalama ai Tulafono nei i le Maota nei ma e aua i le toe iloilo o le tatou 60 aso lea e i ai nei i le 90 aso. Talu ai ona faaopoopoina pea ia atunuu o le lalolagi, ua agai e faa 90 aso o tagata asiati atu, e faafaigofie ai ia mea nei o faigamalaga. A uma loa le 90 aso e moomia le toe faaumi atu ia ona faatoa tapena loa lea o se visa e mafai ai ona faaumiumi. I le taimi nei, e i ai ia atunuu Europa ua uma ona sainia le tatou Feagaiga i le 2015 e mafai ona omai ai ia latou foi mai Europa le Iuni a Europa, e omai i le tatou atunuu e aunoa ma le tau tapa o se pemita e omai ai, e faapena foi la ma isi atunuu o Europa e le o i ai i totonu o le Iuni. Ua uma foi ona tuuina atu i ai le faatagaga.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

O lona uiga, a o foi la o tatou tagata i o i atunuu ia, e leai foi ni visa mo le 90 aso. O lona uiga o le mea foi lele e avatu e tatou le avanoa lea, ia ae toe aumai foi e latou le avanoa tutusa lava lea, e omai ai latou e omai fua e leai ni pemita, ae o atu fua foi tatou e leai ni pemita, e faafaigofie ai femalagaiga. Ou te manatua aso la a o ou galue foi o le public servant, e i ai taimi na ou malaga ai e leai sou visa, ia ona ou nofo nofo ai lava lea i iina mo le 2 i le 3 itula ae se i saili ane se tagata e faamaonia lou ulufale atu i fonotaga foi sa usuia sa ou auai. O lea la ua oo mai i le taimi lenei, ua faafaigofie, aemaise lava ia mo femalagaiga a i latou foi o le Faalapotopotoga a Europa o lo o fesoasoani mai ia Samoa. E manatua foi o le Iuni lea a Europa, lea sa latou faatupea ia le seleni tele na fausia ai e \$60miliona, lea na fausia ai ia tane tetele ia e i i Ululoloa lea e inu uma ai le taulaga i Apia ma faasolo atu ai i le itu i Sisifo ma totonu o le taulaga. O latou foi ia na aumai le \$60miliona e faatupe ai ia tanevai tetele ia e i Vailoa, lea e inu ai le toatele o Faasaleleaga, ma o le Iuni a Europa sa latou amata ona aumai a latou fesoasoani ina ua uma ona sainia le Feagaiga o le Rome Convention i le tausaga e 1975.

O le mafuaaga foi lea na ala ai ona faatu le tatou Ofisa o le Amepasa i Peleseuma i le tausaga e 1984, ona o le taua o atunuu nei Europa lea e maua mai ai ia fesoasoani, e i ai foi taimi e tele ai foi a latou fesoasoani i le fausia ai o nisi foi o faleaoga, ia ma asiasi mai pea e le tuua le omai mai pea e asiasi mai i Samoa nei ma faatalanoa ma tatou ia nisi foi fesoasoani e moomia e lo tatou atunuu. Ma e auala uma mai fesoasoani nei i lalo o feagaiga galulue faatasi o atunuu o Aferika Pasefika ma Karepeane ma Aferika i le va ma Europa. O lea la e ala ai ona manuia ai tatou, manuia ai atunuu o le Karepeane manuia ai ma Aferika. O lea foi la o le tausaga fou toe amata ai ona toe iloilo ai lesi feagaiga fou e 5 tausaga, ma o lea la o tatou le atunuu muamua lea ua ave i ai le tatou talosaga, o le taimi e uma ai ona faatalanoaina ia lesi feagaiga tele i le va o Europa ma atunuu o Aferika, Pasefika ma Karepeane, ona aumai lea o le Feagaiga e saini i Samoa. O le atunuu lea e 79 le aofai o atunuu ia e i ai i totonu. E manatua foi e 193 le aofai o atunuu o le Malo Afaatasi lea na fono mai i Samoa nei.

O lona uiga la a faatusa le Malo o Europa i le Malo Afaatasi lea na tatou talimalo ai, e faigofie ona tatou talia ia le sainia i Samoa nei, a o auala ia e tatou te saili malo ai, e faalauiloa atu ai Samoa ma tele ai foi seleni e maua e lo tatou atunuu, e auala i pisinisi o lo o fai, ia ma maua ai foi galuega mo a tatou fanau. O le taua lena o le Tulafono lenei, ina ia faafaigofie ai ia femalagaiga. E le gata la o tatou a o latou e ulufale mai. O le mea la lea ua matauina, o lea foi ua talosaga mai ma isi atunuu, e taipei o Iapani, o lea foi e maua ai le tele o tatou fesoasoani, masalo o Iapani o le atunuu aupito maoae lea i le tulaga o latou fesoasoani, fai fua faleaoga o le tele o nuu, ia e le gata i lena o latou ia e aumai ai ia vaa tatou te faaluelue atu ai i Tutuila ma Savaii. O lea o lo o faasolo nei le faafouina o le uafu, o le tamai uafu lea i Matautu.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

O lea foi ua logoina mai o le a latou fausia ia le aualalaupapa tele lea i Vaisigano. O se atunuu e fulisia atu a latou fesoasoani i le grants, foai, ia ma o latou foi lea e i tua o le tele o le atinaeina o le eletise i Fiaga e tele le latou fesoasoani mai ia Samoa. Ia ma o lea ua iu lava ina faatu le latou Embassy, Ofisa o Amapasa i totonu o Samoa e aofia ai i Niu Sila, ia o lona uiga o Iapani, Niu Sila, Ausetalia ia ae faapea foi ma Saina ma Amerika, o lea foi ua iinei ia latou Ofisa o Amapasa.

Ia o lea foi la ua aumai ia le faatalauala a isi Malo ona o le mea lea ua agai ai le lalolagi e tusa ua 2 nei tausaga talu ona suia Tulafono a isi Malo o le Pasefika e taipei o Fiti. O lea foi la ua tatou taumafai ia tatou e suia ina ia ogatasi ma le mea lea ua i ai ia le tele o atunuu, e moomia ai le faigofie ona femalagaai. E maimau pe ana faapea ia Niu Sila ma Ausetalia, semeamanu faapenei ua le toe overstayer ia le tatou atunuu, toetiiti lava ona uma ona o tagata i Niu Sila e pei o le faaeteetega foi lena, a o atunuu la nei, o lea ua manatu ia le tatou Malo ua sili ona faalaugatasia ia le tulaga o tatou ma nei foi atunuu, ina ia aua ne i misi ia o tatou tagata asiiasi maimoa mai i Samoa.

E faapea sa i ai ananafi nisi o popolega, faapefea ia tagata faatupu faalavelave e ono ulufale mai? E faapefea ona latou omai soona tumuvale ai le atunuu e auala i tulaga foi ia e omai nonofo i tagata faiava ma nofotane iinei? E leai se mea e popole ai i na mea, e mulimuli mai ia tagata faatupu faalavelave na iinei ae muamua ona pue e isi atunuu. A o lea foi e iinei le Ofisa Tutotonu o le Pasefika atoa latou te mataituina ma leoina le Pasefika i tulaga ia, o lea e i luga o le latou Ofisa o le falesamoa foi lele o le Malo lea e tu mai i luga, e nofononofo mai ma a latou mea vaai, ma latou mea faalogo. Ia e le gata i lena, e nofononofo mai ai ma latou mea foi ia o upega tafailagi, e iloa uma ai lava tagata ia e lalafi i tua o upega tafailagi, latou te iloa uma ai lava ma faitau ai tagata e fesootai foi lea na ona e sau lava clock loa i totonu iloa uma lava e le Pasefika ia o oe lea sa e ai mariuana i fea, lena e te sau ma au aisa i totonu o lau taga. O lea la na maua ai le toatele ona o lo o lava le puipuiga o fesootaiga.

O mea ia ua ou tau atua, ae sa le tataua ona ou tau atua ia outou, ae taua foi mo le faalogologo mai a le vaega foi ia e lalafi i tua o upega tafailagi faapea lava e le o iloa. Ia ma le tulaga o le itu lea o le fenofaia, sa tau nofononofo pe i ai se auala foi lele faaetutulafono e taofi ai mea ia. E i ai le isi foi tamaitai na sau, sau lea faiaoga i o i le Kolisi lea i Vailuutai ma Fasitootai, ia a o lo o i ai la se toaina mai Savaii ua 44 tausaga e galue foi lele e faalelei le malae, ae na gau ai lava le loto o le tamaitai lea fai le faaipoipoga, na fai lava iinei. Ia na foi loa lea i o tusi mai i le ulu aoga, ia ua 4 tausaga talu na ma omai ae ua toa 5 lau fanau, ia ma aumai ai tupe foi ia ma le aiga.

Ia se i vaai la i le manaia o lea mea, lea o le omai o tagata mai fafo, o tamaitai maua ni ava ini sogaimiti o la e faasolo e le nuu i le mea lea o le moetolo, ia ae te i lava ua manuia i i, ia ma o atu ai lava i fafo ma maua ai ia manuia sa le iloa i le tulaga o latou e omai iinei ma maua ai o latou taitoalua.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

Ia o le a le tulaga o le a tatou faitio ai i lena mea pe afai i le latou vaai, e aupito i aulelei atu lava a tatou taulelea ia ma a tatou fanau teine i le omai nonofo ai iinei? Ia tuuaia foi le o atu o tatou i fafo ma o atu lava ma maua ai foi a latou paaga ma faaipoipo ai i fafo ma le toe omai ai lava. O mea na e moomia e tele mau auala e maua ai galuega a tatou fanau.

Ia o le mea la lea, e leai se mea e popole ai fua i lena mea. O le mea lava o lea e tupu i aso uma, aso uma aso uma. E le gata e tupu ia tatou e tupu foi i isi atunuu, o le mea lea o le omai o tagata e tafafao ae omai tilotilo i o tatou laufanua aupito sili lea ona aulelei i le tele o laufanua ona o le mama. Ia o le mea foi lena o lea e faalogo mai tagata e faalapisia ia o tatou auala, se i tuu ia na mea faamataga o tatou auala, e atili ai ona omai tagata mai fafo, o le tala a le isi fomai na sau ananafi, matou fonu ma le alii fomai lea e pule i le falemai ona o isi fesoasoani ia sa faatalanoaina ananafi, fai mai lana tala ia te au, ‘o le taimi na ou tulaueleele ai iinei, avaga ai lava ma lou fiasia i lenei atunuu, matua manaia tele. E le gata e lanulauava ona laufanua, a o le mama o aualatele. Ia pei lava e pau nai mea e fai ma otaota, ia mo latou foi ia e o tafafao i le po, ia na maua lea o latou aiga ma o ifo onana ma soona lafoai ia latou lapisi i luga o le aualatele, aemaise le faasolo mai lea i o i Satapuala, ia ma agai mai ai i Leulumoega. Ia o lena foi ua taumafai ai ia sui o le Malo, e faamama aemaise o auala ia o le toaiga muamua mai lava lea o tagata e omai mai fafo, aemaise o le taimi lenei o le tafafao mai o tagata e asiasi mai i le Kerisimasi, e matamata i o tatou laufanua ia o nisi o tatou aiga, ia o nisi lava mo turisi e omai e tafafao.

Lau Afioga i le Fofoga Fetalai, o le faamatalaga lena, ou te lagona foi ua pasia foi i le tou faalogo ia le faamatalaga o lenei Tulafono, amata mai lava i le aso ananafi e leai lava se mea fou, ae lelei ona ou toe faalatele, mo le faafogafoga mai o Samoa. Manuia le tatou Fono.

FOFOGA FETALAI: Malo faafetai, ua manino auofala ma ua atili malamalama foi lenei Tulafono. E i ai le manatu o lea sa faamalamalama ma faamanino i le tatou Semina Faa-Palemene i le aso ananafi, ia ma o lea ua toe faaopoopo le saunoaga faamalamalama a le Palemia, ia faamalo faafetai. Ia ua manatu foi, ia ai o le tulaga lea ua manino ai le Tulafono, ma e le o se Tulafono tele ua na o le suiga lava o aso.

Tofa OLO FITI AFOA VAAI (Salega Sasae): Lau Afioga i le Fofoga Fetalai....

FOFOGA FETALAI: Ia se i tulai atu, tuu atu le avanoa i le sui usufono e pei ona tulai mai, le sui usufono mo Salega Sasae.

Tofa OLO FITI AFOA VAAI: Faafetai i lau Afioga i le Fofoga Fetalai mo le avanoa. Leai e le seetia foi lenei itumalo i le malu o le tai taeao i le saunoaga o lenei taeao, i si tamai i le Tulafono lenei.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

E na o le tasi lava le fuaiupu o le Tulafono ae ua 2 itula o tau faamalamalama mai, amata mai i Satapuala, oo atu i Peretania ua ou le iloa po o le a le... ae faafetai i lau Afioga, ua manino le tele o le vaega e pei ona e pei ona e faamalamalamaina i le Tulafono. Ae pau lava si vaega e na o sina fautuaga lau Afioga, ona o lea ua e saunoa i le tatala o pemitā, aumai lau faataitaiga ia Europa, ia e tatau foi ona fai e tatou, manaia.

Pau lava le mea e silasila i ai lau Afioga i le Palemia i le Tulafono Tau Faaofi lenēi, e tatou te le o nonofo nonofo lava tatou o, se i vagana ia malaga faalemalo e oo ai o tatou tagata i Europa, ae o le omai o Europa, e pei o le to mai o le timu lea ua timu mai. O le ala foi lena lau Afioga i le Fofoga Fetalai, e ao lava ona avatu se fautuaga ia tatala pemitā i se tulaga mautu ma saogalemu mo le tatou atunuu lau Afioga i le Fofoga Fetalai.

O le isi mea lau Afioga i le Fofoga Fetalai, o le 90 aso lenēi, sa ou faapea o le a agai i tua mai le 60 i le 30 ona fuafua mai lea e le Matagaluega o Femalagaiga ia pemitā i tuu atu. E le o toe saogalemu le lalolagi i le taimi lenēi. E le gata foi la i tagata faatupu faalavelave ma o tulaga ia, ae i ai lava le vaega ou te popole i ai.

I le tilotilo atu i mea ia o faamatalaga i luga o news ma tulaga uma, ua increase ia le tulaga o refugees, tagata sulufai mai lea atunuu ma lea atunuu. I lau tilotilo i le 90 aso nei, ua ova tatala le avanoa. Ae ao lava i le tatou Malo faafautuaga atu, ona silasila lelei i le tulaga lea e le o toe faigofie nei aso. Ia aua e avea lava ia le mea ia e kami mai ai le isi refugee ia nofo i le 90 aso lea, tope tope ai sana pemitā i Niu Sila po o Fiti po o fea, o le mea foi lele tatou te puipui foi ia i tatou atunuu i autafa o tatou i le saogalemu. E pei o si mea lena o lea ua avatu ai se lagona vaivai lau Afioga i le Fofoga Fetalai, se i toe silasila i le 90 aso lea, ua fai si umi, ma e leai foi se tagata turisi po o se tagata e malaga mai e sau e nofo i i se 2 vaiaso po o se masina. Ia a o le mea lea ua vaai atu i ai ua 3 masina, ou te le o iloa pe...ia ai na o le tagata e sau o le a nofomau i inei e fai ai ona pepa nofomau, ia ona faatoa fetui lea o le 90 aso. Ma le agaga faaaloalo faafetai.

FOFOGA FETALAI: Ia ua maua atu. Ia...

Afioga FAUMUINA ASI PAULI WAYNE FONG (Itumalo Tu Taulaga Sisifo): Lau Afioga i le Fofoga o le Fono....

FOFOGA FETALAI: Malie le Malo, toe pau lea o le saunoaga, ia se i tulai mai le sui usufono.

Afioga FAUMUINA ASI PAULI WAYNE FONG: Faafetai lava mo le avanoa ae se i faapuupuū atu manu e le i...

Faafetai lava mo le folasaga malamalama foi a le Afioga a le Palemia o ia e patino i ai lenēi Tulafono. Ia lea foi ua tali mai i nai popolega sa i ai ananafi, ona e sili atu le atamamai o tagata i fafo, i lo tatou nei. O le puipuiga lava lea e i ai o le saogalemu o si o tatou atunuu.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

Ae i ai se manatu e fia tuu atu e uiga la i le lalolagi atoa e mafai ona omai i Samoa, ae le mafai e Tutuila po o Amerika Samoa ona omai i Samoa i totonu o le 90 aso lea. O le agaga foi lea ua i ai lo tatou atunuu, e tatou te le o toe manaomia Tutuila, e le o toe o foi ni o tatou tagata i Tutuila. Ae o le tulaga e i ai, tatala lo tatou va ma Amerika Samoa e omai ai e tafafao iinei ma aumai ia latou tupe e faaoga iinei. E leai se mea tatou te popole ai fua i o latou uiga o lo o faatino mai, ae na o se tatalo, tatou amatamea. Tatala i ai ia Tutuila e omai e tafafao iinei ma aumai uma a latou tupe e faaoga iinei, ia aua o tatou ua le toe o i Tutuila. E pau lea o se vaivaiga lea ua avatu i lau Afioaga i le Fofoga Fetalai, a o isi uma Tulafono na, o lena ua manaia. Faafetai lava ma le faaloalo.

FOFOGA FETALAI: Malo, faafetai. Ia o le a tuu atu i o...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioaga i le Fofoga Fetalai, o le mataupu lea ia Tutuila, ua uma ona fai a tatou upu. E manatua foi o le mea sa i ai, sa faigofie ona fai ia tatou pemitā, sa fai iinei, na o le tai \$5.00, ia a o Tutuila, e omai iinei e leai ni pemitā. O lona uiga la, e omai fua latou, ae totogi le tatou pemitā e o ai i Tutuila. E na o mea la o vale foi lele o malo faavalevā e omai isi e omai fua iinei, ae o atu tatou e totogi. O le aiaiga la sa i ai i lena taimi, tau taofiofi le suiga o tou Tulafono, se i fai se tou Ofisa iinei e faigofie i o matou tagata ona maua ia le avanoa lea e fai ai pemitā iinei, e faigofie ai ona o atu i Tutuila, ona taoto ai lea faapena, te'i ane, ua alu atu le tatou vaa foi lea e tumutumu atu i tagata, e alu atu ae na fai i le aso na muamua atu ia le Tulafono e faasa ona toe o atu nisi i pemitā na. E o atu la o tatou tagata ma latou pemitā, ua sui le Tulafono a Tutuila e aunoa ma le muai logo mai o tatou. Ia o lena la na ala ai ona sala le tatou vaa ae \$20,000, ona fai loa lea o le iuga a le Kapeneta, e faapea. O le a alu loa tatou i le Tulafono foi lele o le Reciprocity. O le a le uiga o le Reciprocity? A sau fua outou alu atu fua matou. A e a totogi loa le visa i ina, ua totogi foi le visa a outou iinei. E \$10 la tala Amerika na charge ai tatou, ia ona fai lea o le iuga a le Kapeneta, o le a \$10 foi e totogi ai a outou visa e omai iinei. Ae faapena le mea. Ia ona omai foi lea o le Kovana mai Tutuila ma matou talanoa, fai mai e tatala. Ia o lau tala na fai i ai, e le mafai ona toe foi tatou i le mea tuai. Ua ova i le sefulu tausaga o outou omai fua, ae a o atu matou ua totogi? Ia o lea foi la ua outou nonofo nonofo lava outou ma faafaigata. Ia o le mea la lea, e lelei foi la ona outou lagona le faigata, a o le taimi lava e o atu fua ai iinei, ia omai fua foi outou. O le lea la lena na ala ai ona faatu le tatou Ofisa i Tutuila, ia faafaigofie i tagata Tutuila ona malaga mai. O lea la ua sologa lelei ai ia mataupu. O lau fautuaga la, ua matua le taitai talafeagai.

O le tulaga....

Afioaga FAUMUINA ASI PAULI WAYNE FONG: Lau Afioaga i le Fofoga Fetalai....

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

FOFOGA FETALAI: Malie se i

Afioga FAUMUINA ASI PAULI WAYNE FONG: Sina tamai mea lava lea se i faasao atu lava faamolemole?

FOFOGA FETALAI: Ia.

Afioga FAUMUINA ASI PAULI WAYNE FONG: Leaga o lea e i ai le tulaga lea, a totogi tatou e o i o, totogi o, omai i inei. O lea e totogi le \$380 a tatou e o i Niu Sila, ae omai fua Niu Sila ma Amerika. E le o mafai la ona tatou faia le mea lea i isi atunuu, a o lea e faia e tatou o le manatu lea. A o lea tatou te talanoa....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea e sese le mea lea e fetalai mai ai le sui usufono.

FOFOGA FETALAI: Se i faamalamalama le Malo. Malie le sui usufono mo le Itumalo Tu Taulaga Sisifo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le mea e fia faasao, o lea e talanoa i Tutuila. O le mea la e fia faasao, o Tutuila ia, o lea ua taoto i le tulaga foi lele e lelei ua talia lava e Tutuila le mea lea ua i ai nei. Aua o taimi uma lava e talosaga mai ai, ia ona ou fai lea i ai, ia e tatou te o lava i le faavae, o le faavae, a outou manao tou te toe omai fua, e o atu fua foi tagata i inei. Ae i ai la le taua o le taofiofi o Tutuila, e i ai foi le taua o si o latou foi taofiofi, ona o tulaga e laititi le atunuu, ia ae toatele tatou, ia ma o i lea e sosola i ai le toatele o le aufai alaga lea ma le au faaletonu a tatou. O le mafuaaga la lena o lea na ou tulai atu ai, na o le pau na tulai mai ai le sui usufono o Tutuila, ou te tali atu foi la na o Tutuila. O lea la ua taoto lelei le va o tatou ma Tutuila.

A o le tulaga lea na aumai e le sui usufono ia i latou foi lele o le au sulufai, e i ai le au sulufai na omai i inei, ae tau ina ou faapena atu. Ua uma lelei lava ona fai i ai le iuga, e le qualify e le agavaa. O lona uiga po o le fai, po o le lē faia o tatou tulafono, e i ai lava le au sulufai e taumafai i ituaiga taumafaiga eseese e fia ulufale mai. O le tulaga foi lea e tataua ona matua faamautu lelei puipuiga, lau Afioga i le Fofoga Fetalai, o lea lava e mautu le puipuiga, e le soona faia e le Malo ni tulaga foi lele e ono aafia ai, e pei lava ona ou fai atu, o le sui usufono foi e fai lana pisinisi foi lele e moomia ai ia tagata tafafao maimoa mai fafo, le pisinisi foi lea o mea o falepia. Ia e tataua la ona e malamalama lelei, e leai lava ma se tagata tafao maimoa mai fafo e o atu e faatau ni au pia, pe a fai le mea lena e te manao i ai. E ui lava o lea foi e matau lelei e le Komiti lou solitulafono, ae o lea lava e onosai le Komiti e Pulea ia Ava Malosi.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – faitauga faalua**

O le mea la lea, a ta tutu i totonu o le Palemene lenei e lauga mai i lou puipuiga, e tatau foi ona e tilotilo i isi, po o a mai oe ma lau tausiga o le Tulafono? Aua o oe le isi tagata solitulafono lea e i ai i totonu o le Maota lenei.

FOFOGA FETALAI: Tulai mai le sui usufono.

Tofa Olo Fiti Afoa Vaai: Lau Afioga i le Fofoga Fetalai, a tau ni tagata solitulafono, o tagata ia, na o nisi foi lele ae le o Afioga uma i Minisita ma....

Lau Afioga i le Fofoga Fetalai, o lea ua ou te i atu i i Refugees ia ua omai iinei. Pe faapefea ona maua o latou visa e omai ai i totonu iinei ma nonofo iinei, a o fea foi la lea e nonofo ai? Ou te iloa, e i ai la si mea na i ai i tua, po o fea la o alu ai si fesoasoani foi lele a le UN lea e aumai e tausi ai Refugees i totonu o Samoa?

FOFOGA FETALAI: Se i saunoa atu le Malo e faamalamalama le vaiiliu lea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ia ma ua uma ai foi ma lona lua avanoa. E ala ona ou tulai atu e faasao, ona e i ai le mea e fia faasao. O lea na ou fai atu pe pasi le Tulafono, a? Pe le pasia, ae pe le i i ai se Tulafono, ae o atu lava tagata e maua lava i so o se atunuu ia tagata faapena, e omai foi lele e omai o turisi ae mulimuli ane ua refugee. A o lea lava la, o totonu o le tatou le Ofisa o le Loia Sili e tusa ma le 50 Loia ia e i ai, 50 o Loia maoae ia o le atunuu. O lona uiga, o lea lava e malupuipua, e leai se mea e te popole ai fua i lena mea. A i ai lava se tagata e sau faa-refugee, e le faapea e aumai loa o ia o le refugee ona talia lea. E leai e i ai ia Tulafono, e i ai ia suesuega e tatau ona fai. O le mea foi lena o lea e tumutumu ifo ai ia refugees i i Ausetalia ma toe faafoi. Ona o isi tagata, e le o ni refugees faamaoni.

Lau Afioga i le Fofoga Fetalai, o le fesoasoani atu lena.

FOFOGA FETALAI: Malo faafetai. Ou te faamalulu atu. Se i onosai mai lava le sui usufono. Leai, o lea ua saunoa le Malo e faamalamalama ma e talifuaitau i mea sa e fesiligia ma laga e le sui usufono, ia o le tali lena. E leai se faafinauga aua leaga o le tali a le Malo o le faapupulaga lena o lea e i ai nei, ae le faapea e taumafai e tatai atu le finagalo o le Malo i lou finagalo le malamalama lena e i ai, ia po o le malamalama foi ae le fia malamalama.

Tofa Olo Fiti Afoa Vaai: Lau Afioga i le Fofoga Fetalai, ona o lea sa tuuaia lava au leai e ese le mataupu lea, leaga o lea ua e tuuaia mai au na ou solitulafono, leai e solitulafono le Minisita o Tupe Maua na mafua nei ona tapuni lau bar. Ia o le a outou silasila foi la i ai i le mea e tatou te o i ai o le a faafofoga foi le atunuu, po o ai o maua lea na solitulafono.

19 TESEMA 2017

**Tulafono Tau Faaofi o Teuteuga o le Tulafono o le Ulufale mai o
Tagata 2017 – iloiloga auiliili**

FOFOGA FETALAI: Se o le mea e popole ai, ne i taunuu ai le upu a le palagi foi lele, e koe oki lava kakou ia kakou.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Ulufale Mai o Tagata 2017 i lona faitauga faalua.

**TULAFONO TAU FAAOFI O TEUTEUGA O LE TULAFONO O LE
ULUFALE MAI O TAGATA 2017 – iloiloga auiliili**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoao mo le iloiloga auiliili o le Tulafono Tau Faaofi.

E tusa ai ma Tulafono Tumau, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 12(1).

Faamaonia.

FUAIUPU 3: Soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Ulufale Mai o Tagata 2017.

Faamaonia.

Na faagasolo le Tulafono Tau Faaofi o Teuteuga o le Tulafono o le Ulufale Mai o Tagata 2017 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O LE
ULUFALE MAI O TAGATA 2017 – faitauga faatolu**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoao mo le faitauga faatolu o le Tulafono Tau Faaofi.

19 TESEMA 2017

**Tulafono Tau Faaofi o Teuteuga o le Tulafono o Solitulafono 2017
- faitauga faalua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ulufale Mai o Tagata 2017 i lona faitauga faatolu.*

Faaluaina e le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Maota.

Na faataatiaese Taualumaga a le Fono Aoaofaitulafono mo lana malologa masani i le itula e 10:46 i le taeao ma toe faaauau i le itula e 11:25 i le taeao.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Faitulafono. Ua ou manatu ua maua le faasiligamalosia i usufono mamalu o le Palemene e faaauau ai le tatou galuega, aemaise foi o Ofisa Sili o Pulega o Matagaluega ma Faalapopotoga a le Malo.

**TULAFONO TAU FAAOFI O TEUTEUGA O LE TULAFONO
O SOLITULAFONO 2017 - faitauga faalua**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati, ua maea ona sainia e le Taitai o le Maota. O lea o le a sagai atu ai loa le Fono Aoaofaitulafono mo le faitauga faalua o le Tulafono Tau Faaofi.

Ma le faaalalo ou te tapa lau Afioga i le Minisita mo Faamasinoga ma Pulega Tau Faamasinoga.

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Solitulafono 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Fesootaiga, Faamatalaga ma Fesootaiga Vavave Faaneionapo.

FOFOGA FETALAI: Ou te tapa lau Afioga i le Minisita mo lau saunoaga faamalamalama.

19 TESEMA 2017

**Tulafono Tau Faaofi o Teuteuga o le Tulafono o Solitulafono 2017
- faitauga faalua**

Afioga Hon FAAOLESA KATOPAU T. AINUU: Faafetai i lau Afioga i le Fofoga Fetalai. A ou fua atu i le tali sa tali mai ai le mamalu o la tatou au usufono ananafi, ina ua maea ona ou faamalamalamaina le Tulafono Tau Faaofi lenei, ou te lagona e leai se isi vaega tele ou te toe faamalamalamaina aua sa pati ma faafetai ma luelue ulu mai le toatele o i latou sa auai i le aso ananafi. Ae leaga o lea ou te vaavaai atu e i ai nai sui usufono ia pe tasi pe lua, o lea la o le a toe faamalamalama atu foi.

E lua lava auala e oo ai le tagata i le faamasinoga i le lalolagi atoa lenei, o claims e tau o le civil ma claims e tau o le criminal. Na o le pau lava lea o auala e molia ai oe e se isi i luma o le faamasinoga.

O lea la ua i ai le tatou Tulafono e masani lava ona faaigoaina e tatou o le Deformation of Character, o le civil claim lea. Ao le teuteuga lenei o le Tulafono lea e taumafai atu i ai le Matagaluega, ina ia toe faaofi i totonu le vaega lea o le Tulafono o le Criminal. Ou te iloa e fesili nisi o i tatou Samoa o lo o faafofoga mai, o le a le mea o le a toe faaulu ai lena Criminal o lea ua i ai le Civil? E puupuu lava le tali i lea mataupu. Silasila foi outou, a tauave le faamasinoga Civil i luma o le faamasinoga, e tapa le auunaga faaloia e faataua lea mataupu aua e fai si lavelave o le mataupu. O lea la e matau atu i le mataupu lenei, e le gafatia e le toatele ma le anoai o tatou tagata le auunaga lenei faaloia. A o lea la ua faaulu le teuteuga lea o le Tulafono i lalo o le Criminal, lea la e le tau avea i ni loia pe a molia oe i se Tulafono. E mafai lava e leoleo ona faaulu le moliaga ma fai le faamasinoga atoa i le taunuuga e taunuu i ai. O le ala la lea ua ala ai ona ae se tofa, ma o le Tulafono lenei e le o se Tulafono fou, o le Tulafono ua leva ona i tatou tusi ae na aveese nei lava i le 2013 talu ai lava le fautuaga a isi loia. A o lea ua vaavaai atu le Malo, ua tele tagata e sulufai atu i le Malo mo se laveai, ona e le gafatia le tofogi o loia. O lea la ua teuteu ai le Tulafono lenei ma le agaga maualuga ina ia agavaa i ai le atunuu atoa i lea teuteuga.

O lau faamalamalamaga puupuu lea mo le silafia, aemaise lava i latou e le i ai i le aso ananafi, i le agaga o le teuteuga lenei ua ala ai ona taatia i luma o le Fono nei. Ma le faaaloalo lava.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai...

FOFOGA FETALAI: Malo faafetai. O lea ua tulai mai le sui mamalu mo Anoamaa Sisifo. Ou te tapa lau Afioga.

Tofa Hon LAUOFO FONOTOE NUAFESILI PIERRE LAUOFO: Faafetai mo le avanoa. Ae muamua lava ona faamalo i lau Afioga i le faafetai foi na siitia i lenei taeao. Ua e faailo le atumua e pei o le fetalaiga i le faatamasoaliiga o le tai. Ae o le upu foi e fai i le faiva o poula ua maea ona sasa le fala aua lo tatou nonofo tapuai ai i le Atua ma Lona finagalo. Ou te manatu o lele ua malutau'ee le Maota o Samoa i lenei taeao ua nofoia le pou o lauga.

19 TESEMA 2017

**Tulafono Tau Faaofi o Teuteuga o le Tulafono o Solitulafono 2017
- faitauga faalua**

Ona manatu lea o faalupelupe ma faalagilagi o le atunuu, ia o le a taoto ia faamaene o tai loloto, o le a le oo i ai se tautalaga. Ou te tulai atu e momoli atu foi le faafetai, o lea ua maea ona sao i alo le taumafataga ma le taligasua a le Maota, ua maua foi se matou faasiligamalosi i lenei taeao.

Ou te tulai atu e fai se sao o lenei itumalo e tusa ai ma lenei Tulafono Tau Faaofi. E momoli atu le faafetai i le Afioga i le Minisita i le manatunatu ma le magafagafa foi i le toe faauluina mai o lenei Tulafono. Ma ou te manatu o se Tulafono foi ua talafeagai mo le taimi lenei. O le Tulafono e molia ai le tagata ua faatino ni lomiga ma faasalalauga tau faaleaga i se isi uso a tagata. E tasi lea tulaga matuia i lou talitonuga. Aemaise lava la le vaitau lenei, e le o po se lilo i le tulaga o le faaaogaina o tekonolosi faaneionapo e lolomi ai ma faasalalau atu ai mo faasalalauga taufaaleaga pe faaleagaina ai ma tauleagaina atu ai se tagata.

O le mafuaaga lena o le fia avatu o se manatu, a o se motugaafa e tusa ai ma lenei Tulafono Tau Faaofi e faasalalau ai ni faamatalaga e le moi pe sese, po o ni faamatalaga matuia. Ona manatua lea o telefoni, i le faaaogaina o le text e ta ai mo mea o faamatalaga taufaaleaga ona lafo atu lea i le isi tagata i le isi itu i le isi telefoni. Ua faatupulaia tele i lenei vaitau, ma e le o se uiga lelei. O le mea lea ou te faafetai ai i le Afioga i le Minisita ma lenei Tulafono Tau Faaofi. E le o po foi se lilo i le tulaga ua i ai le social media i lenei vaitau, e aofia ai ma le facebook. O le upu moni lava lau Afioga, o le aso Gafua a lo matou nuu na se i mavae atu nei, na talanoaina ai foi mea ia. O mea o talavou foi ia i totonu o le nuu, ae ua fai faasalalauga i luga o le facebook, ae o matua faasalalauga matuia, leaga ma tauleaga ai fua isi tagata. Aua ua leai ni tuaoi o nei upu e faasalalau solo.

E pei o tulaga na lau Afioga e vaavaai atu ma le faanoanoa. E oo foi i imeli, o imeli foi i nei vaitaimi ua faapena ona ta ai foi ni faasalalauga leaga ona lafo atu lea i nisi foi imeli. E pei o le tulaga lea o lea e popoe ai le taofi, aua e pei e foliga mai i lenei vaitau ua leai ni tuaoi o mea nei. Ae faafetai i lau Afioga i le Minisita.

E pau lava le isi itu lea ou te soso atu ai foi, faafetai o lea e aumai, aua o lea ou te vaavaai atu o se faasalalauga e fai i se faamoemoega e faaleaga ai se tagata. O lona uiga, e maualalo lava le fua lea e fua ai, e faigofie la ona faamaonia. Ae pau lava le tulaga e i ai, ona o lea e silafia e le Maota ma tulaga ona e pei e lafo atu i luga o text ma mea faapena, o lona uiga e tatau lava ona maua le isi itu, e saili po o ai tagata ia na faia le faasalalauga, atonu o se lu'itau lena e feagai ma latou o le a sulufa'i e faaaoga le Tulafono lenei. Ae i ai lou talitonuga e maua lava, e maua.

O le vaega lea e aumai o lo o aumai ai le tulaga o le tetee, lea e i ai le defense lea e aumai i totonu o le Tulafono e faapea o le defense pe a faapea e moi pe sa'o le faamatalaga tau faaleaga po o se mea na tupu. E pau lava lou atugaluga i le tulaga lea lau Afioga, ona ua i ai foi isi faiga foi ia, o ni mea na tutupu ua leva, fasefulu tausaga limasefulu tausaga.

19 TESEMA 2017

**Tulafono Tau Faaofi o Teuteuga o le Tulafono o Solitulafono 2017
- faitauga faalua**

O mea ua uma foi ona fai i ai ni faaiuga a ni faamasinoga, pe ua uma foi ona totogi se sala, ae ua toe aumai ma toe aumai. Ae pei e foliga mai e atagia ai, e taufaaleaga, ae mo'i a o mea ua leva pe ua uma foi ona faafalepuipui ai se isi, ae toe aumai lava ma toe lalaga mai. Ona o lea ou te matau atu i le tatou Tulafono o lea e alu lava nei le faitauga faatolu, a o lau lava fautuaga mo le lumanai e manaia pe a tapulaa le taimi, o le defense lea. Faatapulaa le taimi i mea na tutupu po o le lua tausaga tolu tausaga talu ai ua tuanai. Aua o isi faiga ia e fai, e pei e toe lalaga mai toe faasalalau toe lalau, a o le defense lea e alu lava pe selau tausaga lea e i tua e apply lava le defense lea. Ae o lea e faaoga, e le o faaoga la e faasalalau o se mea moi na tupu ae faasalalau foi lele i le agaga e taufaaleaga ai le isi tagata. E pei o le tulaga lena lau Afioga.

E faaiu atu ai sa matou motugaafa a lenei itu, o le vaega lea e tatau ona silasila lau Afioga i le Minisita, ona o lea ou te vaai atu i le Tulafono e pei foi lele e confine na o lomiga o faasalalau. Ae i ai isi ituaiga faiga, e pei foi la o le taufaaleaga tuufofoga, ae maua lava mau e tatau lava ona faamaonia i le faamasinoga. E pei la e le o aofia ai i le Tulafono lea ia tulaga na. O isi taufaaleaga e faaoga ai ata, e tusi le ata e pei o ni ata komi. O le Paeaiga na tea nei, na sau foi ou ata faapena i le isi nusipepa e tusi mai lou ata, aemaise lava le Afioga i le Palemia ou te vaai soo lava i le pepa, e pei foi lele e faakomi le tusiga, ae pei e i ai se uiga. O isi foi ata e pei e foliga mai e tusi foi lele e te vaai atu lava e pei e tau faaleaga. E pei o mea na, o nai mea ia e le o aofia i le tatou Tulafono Tau Faaofi. E fautuaina le Afioga i le Minisita se i toe tagai ane i vaega ia i le agai i luma. E pei o nai manatu ia e tau ina lalafu atu i luma atonu foi e faatupu manatu mo le agai i luma. Ae faafetai mo le avanoa lau Afioga i le Fofoga Fetalai.

FOFOGA FETALAI: Faafetai lava mo le saunoaga ma le fautuaga i lau fetalaiaga a le Nofu. Ia se i lafo atu ia i lau Afioga i le Minisita e te saunoa.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fetalai. O le a ou tali atu i le mataupu muamua lea e laga e le sui usufono, o le loia foi.

O le mea lea e pei o le defense lea e faaoga i totonu o le Tulafono, se i toe tilotilo i ai le Matagaluega aua e leai se mea e tau o se moi na o le lua tausaga ona pepelo laia. E pei o le mea lena e tuufau ai e alu i tua lava, e mamao i tua le mea e gata ai le fua. Ae se i tau vaavaai i ai po o le a se ituaiga faiga e faataunuu ai le finagalo o le susuga i le sui usufono.

O le isi mataupu lea e taua, e sao lelei lava le mataupu lea e le o aofia ai a tatou faamatalaga tuugutu. Silasila foi i le igoa o le Tulafono pe a faa-Peretaniaina, o le criminal liable. O lona uiga na o mataupu e tusitusia ae le o aafia ai i faamatalaga ia faapea... ou te iloa o la e i ai lava le Tulafono e kava ai faamatalaga tuugutu. Ae pei ona ou fai atu, o le a toe silasila i ai ona toe aumai foi lea o nisi teuteuga i le lumanai. Ma lou faaloalo lava.

19 TESEMA 2017

**Tulafono Tau Faaofi o Teuteuga o le Tulafono o Solitulafono 2017
- iloiloga auiliili**

FOFOGA FETALAI: Ia se i toe tuu atu le avanoa i le sui usufono mamalu mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, leai e laitiiti lava si mea lea ou te le o... faafetai i le Afioga i le Minisita mo le saunoaga manino. O le defense lea ou te talanoa ai e tuu i ai se time limit, e le faapea o le a uma ai le moi po o le sao o le mea na tupu. A o le uiga lea e avatu i lau tautalaga e ave i ai lau faamamafa, o le mea moni, a o lea e aumai e faaoga e faaleaga. E tusa o lona uiga e pei e faaoga i se uiga foi lele e faaleagaina ai le tagata a o se mea ua leva, ua uma foi ona fai i ai tala ma teuteu, po ua falepuipui ai foi se isi, ua uma ona faamagalo. E pei o le uiga lena o le tala, ae lafo atu pea, o lea ua saunoa le Afioga i le Minisita. Faafetai.

FOFOGA FETALAI: Malo. Ia lafo ia se i silasila i ai le Matagaluega ma le Malo i le malie o le fautuaga.

Na faamaonia le lafo ma faitauina le Tulafono Tau Faaofi o Teuteuga o le Tulafono o Solitulafono 2017 i lona faitauga faalua.

**TULAFONO TAU FAAOFI O TEUTEUGA O LE TULAFONO O
SOLITULAFONO 2017 – iloiloga auiliili**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoa mo le iloiloga auiliili o le Tulafono Tau Faaofi.

E tusa ai ma Tulafono Tumau, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua faaofiina le Vaega 9A fou.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Solitulafono 2017.

Faamaonia.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

Na faagasolo le Tulafono Tau Faaofi o Teuteuga o le Tulafono o Solitulafono 2017 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
SOLITULAFONO 2017 – faitauga faatolu**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoao mo le faitauga faatolu o le Tulafono Tau Faaofi.

Tulai mai lau Afioga i le Minisita o Faamasinoga ma Pulega Tau Faamasinoga.

Afioga Hon FAAOLESA KATOPAU T. AINUU: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Solitulafono 2017 i lona faitauga faatolu.*

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA (NU.2) 2017 – faitauga faalua**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoao mo le faitauga faalua o le Tulafono Tau Faaofi.

Tulai mai lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga faalua, ma ou te fia tautala faamalamalama i ai.*

Faaluaina e le Minisita mo Tupe, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Galuega, Felauaiga ma Atinae Eseese.

FOFOGA FETALAI: Ou te tapa lau Afioga i le Minisita mo lau saunoaga faamalamalama i le Tulafono Tau Faaofi.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. O le sini autu o le toe teuteuga o le Tulafono Tau Faaofi lea, o le toe suia mai lea o le aso e faagata ai invest i totonu o hotels nei ua uma ona pasia mai le aso 30 Iuni 2017 i le aso 30 Iuni 2018 e toe faaopoopo ai le taimi e mafai ai ona toe invest nisi i totonu o faletalimalo e valu lea ua uma ona pasia. E le mafai ona toe i ai nisi talosaga fou e toe talia, vagana lava talosaga ia na pasiaina e le Kapeneta ma le Fono Faitulafono i le 30 Iuni 2017. A o le avanoa lea ua mafai ai ona tuu atu i tua i le isi ono masina lea e mafai ai ona toe invest mai nisi. E i ai foi le vaega e suia ai le Fuaiupu 104A o le Tulafono. O le taimi nei e le o faatapulaaina le faaaogaina o fesoasoani nei, e tuusaunua lava seia vagana ua uma ona faaaoga lafoga nei e totoi a o lea ua faatu atu e lima tausaga e faaaoga ai. A uma le lima tausaga e le i faaaogaina ua forfeit uma le investment. Pe i ai foi se vaega o lafoga ia e totoe ua le toe faaaogaina e faagata i le lima tausaga. E leai lava la se suiga tele, pau lena o le suiga ua faalaitiiti mai tausaga e faaaoga ai le lafoga lea na o le lima tausaga. A o le taimi lenei e tuusaunua seia vagana lava ua uma invests a kamupani ia e invest i totonu o faletalimalo nei. E valu faletalimalo ua uma ona pasiaina ma taliaina, o le valu foi la lena a i ai nisi e fia invest i totonu, o le ono masina lenei e tuu atu e invest ai i totonu. E pei na o le pau lena o le faamalamalamaga lau afioga, ma o le teuteuga lona lua lea o le Tulafono lau Afioga.

FOFOGA FETALAI: Malo faafetai. Ia o le fesili pe o le a faitauina nei le Tulafono....

Ia, se i tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Lau Afioga i le Fofoga Fetalai e fia faaali se manatu i le mataupu, pe mafai ona tuu mai se avanoa. Masalo a o le i faia se manatu o lenei itumalo i le mataupu ua opea nei i le Maota, e muamua ona avatu se faatalofa a lenei itumalo i le Palemia ma le Kapeneta aemaise foi o le affio o afioga i alii ma tamaitai faipule o le Palemene o Samoa. E faatalofa atu foi i lau Afioga i le Fofoga Fetalai ma le Failautusi aemaise o le Ofisa o le Fono o lo o tautuaina si o tatou atunuu. E fia faatalofa atu foi i le paia i Ofisa Sili o Pulega a le Malo ma Faalapotopotoga Tumaoti, o i latou ia o lo o tua i ai si o tatou atunuu ona o le Fono mulimuli. E faatalofa atu foi i le tapuaiga a Lana Afioga Mamalu, O Le Ao o le Malo, faapea foi le Masiifo aemaise o le Sui o le Fono a Sui Tofia ma le paia o Samoa o lo o tapuaia le Fonousu a le atunuu e faapea foi le aufaigaluega paia a le Atua, aemaise o si ou itumalo pele o Vaimauga Sasae o lo o tapuaia le faamoemoe. Ia o lo o manuia lava le tou sui usufono i le taimi lenei.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

O le mataupu lea ua toe aumai ai e le Minisita le toe tuuina i tua o le aso e uma ai investors ia i le Matagaluega o Tupe Maua, o lea ou te manatua le fonotaga i le aso ua tuana'i lea na toe tatalo mai ai e toe tuu atu i le aso 30 e faauma i le masina lenei. A o lea foi la e i ai le faitauga muamua ma le faitauga lona lua, masalo toe lava o le faitauga lona tolu pasia, a o lea foi la ua toe aumai le isi foi talosaga e toe tuuina atu i le aso 31 o Iulai tausaga fou.

O le popolega lava o lou sui usufono i le vaega lea, o lea ua toe tuu atu le avanoa e omai ai kamupani nei e o e invest latou tupe i hotels ae credit ai latou lafoga pe leai ni lafoga e totogi i le Matagaluega. Ae a silasila lau Afioga i le Fofoga Fetalai, o lo o tigaina le atunuu e totogi lafoga. A o vaega ia o kamupani ia e invest latou tupe agai i hotels, ae penefiti ai i luga o le Matagaluega o Tupe Maua, o le popolega lena o le sui usufono. Ua leva ona ioe atu le Malo e faatino lea fuafuaga. Sa i ai foi la lou manatu i le aso lea na taupuleina e faagata ai i le aso 31 o Iulai i le tausaga lenei, o lea foi la na tatalo le Minisita i le fonotaga e tuuina atu i le masina lenei, a o lea foi la ua toe tatala, o i ina lea e avatu ai se manatu, ona o le popolega o le sui usufono, o lea ua taumafai le Malo e sue uma ni mea e maua ai ni tupe maua a le atunuu, a o lea e gau tatou i mea ia. Aua foi e leai ma se tupe a le kamupani lea o lo o teuina i luga o le Ofisa o Lafoga. E invest lana tupe agai i le hotel, ae credit ai le miliona lea na ave i le hotel. E lua la faamanuiaga a le kamupani lea, maua lana ponesi mai le share pe afai le kamupani lea po o le hotel, ma lana credit lea e i luga o le Ofisa o Lafoga pe miliona lana tupe.

O le popolega la o le sui usufono, o lea ua i ai mea se i tulou, o fale telefoni ua fai o latou hotels, lea foi ua toe o latou toe invest i totonu o hotels ia. O le popolega la, o lea o le a alu alu ai lava le credit lea i luga i le Matagaluega, a o lea e le i faatinoina se galuega, faatino ni hotels nei. Ua leva ona avatu le avanoa i le Malo e faatino, a o lea e vaai mai loa o le a faagata le faamanuiaga lea, o lea la ua toe oso mai.

Lau Afioga i le Fofoga Fetalai, ou te le lagolagoina le toe tuuina atu i tua, aua foi la o lea o le a toe omai e invest latou faamanuiaga nei? Ma le isi tulaga, o le popolega o le sui usufono, o lea o le a o e ave tupe ia e invest, ae credit lava le Matagaluega o Tupe Maua, leai ni tax e totogia, ae o lea e le i faatinoina le auaunaga lea i hotels. E tatau foi la i le Afioga i le Minisita ona silasila i le ituaiga faiga lea, ina ia vaai ua build le hotel, ae a invest, la e ua invest tupe i le kamupani ae leai se mea e faia, penefiti latou i luga o le leai o se tax e totogia ae uma ane e leai se hotel. E faapefea tupe lea e oi ai le atunuu o lea ua tax ai ma faifeau e totogi ai le vaega lea, a o lea o le a credit credit ai lava kamupani ia? E pei o le popolega lena o lou sui usufono....

FOFOGA FETALAI: Ia, se i tulai mai le Malo.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, faafetai i le sui usufono ua tulai mai. Ae ona ua oo le saunoaga a le sui usufono i faafeagaiga, e le o aafia faafeagaiga i le Tulafono Tau Faaofi lea. Talanoa sao mai pea i le Tulafono Tau Faaofi lea, ia e manatua o le 2003 na pasia ai. O lea ua matou taumafai e toe sui ona o le agaga lene e te aumaia. E sao lelei lau saunoaga ae fai mai pea se i uma mai lau saunoaga i le Tulafono Tau Faaofi. Aua e te agai i faafeagaiga.

FOFOGA FETALAI: Ia se i fesoasoani atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua lava le mataupu lea e aumai e le sui usufono. O le mea lene na oo i ai felafolafoaiga a le Kapeneta, e le fou la le mataupu, ae na logoina e le Kapeneta le mataupu lea o le tatipi loa i i, lea na ala ai ona aumai ae peitai, e i ai le tulaga matuia lea e laga mai e faletalimalo ia mai fafo, ona na mafua ona faatino le latou faamoemoe ona o le Tulafono ma le manatu e le ootia i se taimi. E ui lava la ina o lea lava o le a ooti, ae o le toe talosaga mai lene pe mafai ona toe tuu atu la e pei ona toe aumai i i.

O le tofamamao lea e faatino ai le fuafuaga lene, ae lelei ona ou faamanatu atu i le Maota lenei, o le atinae lea o tagata asiasi maimoa mai, o le mafuaaga lene na ala ai ona pasia e le Palemene lenei Tulafono faapitoa na aumai ai ia le faletalimalo tele lava e 320 ma ona tupu potu, o lea na ala ai ona pasia e le Palemene, ave i ai le anoano o le mau faatosina i le tausaga e 1970, e 47 tausaga talu ai, ona o le agaga lene sa i ai i le tatou Malo, ina ia matua uunai le alamanuia lea mo Samoa, talu ai ia lo latou vaai mamao. E pau lea o le ituaiga atinae e mafai ai ona ausia le agaga lea ia faatoatele ia ni galuega mo tatou fanau o nonofo mai aoga. Pau lea o le atinae e gafatia le tulaga lene.

Talu lava ona pasia le Tulafono lene, gaoioi loa ma le faletalimalo tele lea, na gau aano ai lava i le 1972 ina ua uma ona faatu le tamai motu lale. Na uma loa le tamai motu lene ma le anoano o le eleele na toe tanu, gau atu ai lava ma oti atu ai lava ma lene kamupani. Ua fiu la le atunuu i malo, e toe toso mai ni faletalimalo i lene taimi tau mai lava i le taimi lenei, na o le pau lava lea o le faletalimalo lea ua mafai ona tatou maua, faletalimalo e le i taitai oo i le tele lene e 300 lea na manao i ai le Malo, na o le 100 ma ona tupu potu, lea la e i Taumeasina i le taimi lenei. A tuu la i faletalimalo tetele, i ituaiga faletalimalo ua ausia le tulaga o le resort type e omai ai tagata ia sa atugalua ai le isi sui usufono, na o le omai o tagata matutua ma nofonofo iinei, mo le masina atoa, 2 masina 3 masina, e na o le pau lava le latou mea e fai, e na o le nofonofo ma faitau tusi ma tilotilo i luga i le lagi ma matamata i le manaia o a tatou niu, ua leva ona tatou naunau e faatino le mea lene, ae le i mafai. O le ala lene na tau fai ai le Tulafono lea i le 2003, ae lea la o le a toe ooti i i, a o lea ua aliali mai, lea e pei ua faalala atu loa le ooti, lea la na ou tatalaina ai le isi faletalimalo i le vaiaso atu le la, lea la fai, i le Lava.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

O lona uiga, i le toe faaopoopoina atu lea ia Luni, o i ina la o le a momotu ai loa, lea la o le a faatino ai loa isi faletalimalo ia, ona e tatau loa ona faatino, aua e motu loa le mea lea, a le faia, ia ona toe tapa loa lea o le Malo e toe faasau uma ia credit ia na avatu mo latou.

Lau Afioga i le Fofoga Fetalai, o le vaai mamao lena, e pei la foi lele e te'i ai le vaai lata mai i le toe faaopoopo lea ae lea ua ou tau atua, e le i faigofie le tatou toso maiga o le fono tele lea, lea ua tau ai Samoa i le lalolagi. Pau lava lena o le fono lea ma iugafono lea e tau ai Samoa. O le lauga a o lea i totonu o le Malo Afaatasi, Samoa Pathway, Samoa Pathway, Samoa Pathway, i aso uma aso, aso uma, aso uma e faagasolo ai ia fonotaga ia mo le taumafai, ina ia foia ia le faafitauli aupito maoae lea o lo o feagai nei ma le lalolagi o le taumafai ina ia taofia le fesui ai o le suiga o le tau.

O le a le mea na tupu? E le i mafai ona tatou maua ni potu mo le 2000 tagata, lea na aumai ai le vaatele lea mai Niu Sila, le Cruiseship, le vaa o le meli. Ao le faatinoina o fuafuaga ia, e i ai le mea e ao ina tatou onosai ina ia toso mai i totonu ia latou ia, e faatino ia mea ia o faletalimalo ua matua moomia lava i le taimi lenei. O lea na outou faafogafoga mai o ou tau atua, e i ai isi faamoemoega tetele ia ua faataoto nei e le tatou Malo mo taligamalo i le agai atu i le 2020 ma ona talatu. Ae faatoa mafai ona fai mea na, pe a faatino ia faletalimalo ia.

Lau Afioga i le Fofoga Fetalai, 47 tausaga talu ona tatou faatali, ae na o le 1 lava le faletalimalo ua mafai ona tatou maua, aisea? Leaga e le omai ia tagata nei seiloga e lava faatosina tatou te avatua, ma le 2 o le lava o vaalele. Lea la ua lele le tatou vaalele toe tuu i tua ma le mea lea toe o ni nai masina, na o le 6 masina, ia ona uma loa lea. Ou te manatu sa e galue, sa galue le sui usufono, ou te fautuaina ia tuutuu mamao le tofa i le mea lea ua avatu e le Minisita. Lau Afioga i le Fofoga Fetalai o le toe faaopoopo lena.

FOFOGA FETALAI: Malo, faafetai. Atonu ua manino lea vaega sa faanenefu i le finagalo o le sui usufono mamalu, ia o le faamaninoga a le Malo, o lena e limataitaiina ai se mea, i ana faiga faavae ma ana fuafuaga alualu mamao, ia o i ina tatou te fai mea faalogo i ai, ia ae le taofia ai le fautuaga ina ia o tatou malamalama i faiga faavae a le Malo e mafua ai ona toe teuteu ia ma faapena ona aumai ai teuteuga i le tatou Maota nei.

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua (Nu.2) i lona faitauga faalua.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA (NU.2) 2017 – iloiloga auiliili**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua mea ona sainia e le Taitai o le Maota, o lea o le a sagai atu ai loa le Fono Aoao mo le iloiloga auiliili o le Tulafono Tau Faaofi.

19 TESEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 - faitauga faalua**

E tusa ai ma Tulafono Tumau, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le Fuaiupu104A.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga

**IGOA: Teuteuga o le Tulafono o Lafoga o Tupe Maua (Nu.2)
2017.**

Faamaonia.

Na faagasolo le Tulafono Tau Faaofi o Teuteuga o le Tulafono o Lafoga o Tupe Maua (Nu.2) e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA (NU.2) 2017 – faitauga faatolu**

FOFOGA FETALAI: Talu ai ua taulimaina le Tusi Faamaonia o le tulaga faanatinati ua maea ona sainia e le Taitai o le Maota, o lea o le a sagai atu loa le Fono Aoa mo le faitauga faatolu o le Tulafono Tau Faaofi.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga faatolu.*

Faaluaina e le Minisita mo Tina & Tamaitai, Atinae o Nuu, Afioga ma Agafesootai, ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Maota.

19 TESEMA 2017

LAFO MO LE TULAGA FAANATINATI

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e tusa ai ma Tulafono Tumau 45(n), ou te faatu le lafo, *Ina ia tagofia e le Fono Aoa o le tulaga faanatinati le Tulafono Tau Faaofi o le Faafoga o Taaloga Eeseese Tau Tupe 2017 ona o ni mafuaaga taua tele.*

Faaluaina e le Minisita mo Pisinisi ma Alamanuia ma le Minisita mo le Soifua Maloloina.

Na faamaonia le lafo.

TULAFONO TAU FAAOFI O LE FALETUPE O ASIA MO ATINAE TETELE MA LE FAAFAIGALUEGAINA O TUPE 2017 - faitauga faalua

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu loa le Fono Aoa mo le faitauga faalua o le Tulafono Tau Faaofi.

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 i lona faitauga faalua, ma ou te tautala faamalamalama i ai.*

Faaluaina e le Minisita mo Aoga, Taaloga ma Aganuu.

Afioga Hon SILI EPA TUIOTI: Faafetai i lau Afioga i le Fofoga Fetalai, ia o le sini autu o leni Tulafono Tau Faaofi, ia o le talosagaina lea i le faamamaluina o le maliliega i le va o le Malo o Samoa ia ma le Faletupe o Asia mo Atinae Tetele ma le Faafaigaluegaina o Tupe i faletupe. Mo le silafia, o le feagaiga leni e tai ogatasi lava ma feagaiga i le va o le Malo o tatou ma le Faletupe o le Lalolagi le World Bank, ia faapea foi ma le feagaiga ma le Faletupe o le Atinae o Asia. E pei ona silafia, o faletupe nei, o faletupe faavaomalo, e umia ia sea i totonu o faletupe nei e Malo ae le o ni pisinisi po o ni tagata taitoatasi.

O le taliaina ma le faamaonia o le tuuina atu o leni Tulafono Tau Faaofi, ia o le a faapena ona faamaonia ai ia le feutagaina ua maea ona faatinoina i le va o le Malo ma leni faletupe, ma sa tapa foi ia le fesoasoani a le Ofisa o le Loia Sili ia faapea ia le tatou Faletupe Tutotonu ia ma le Matagaluega o le Va i Fafo, ina ia mafai ona mautinoa o lo o ogatasi i aiaiga o leni maliliega ia ma aiaiga o lo o ua tatou malilie foi i ai ma isi faletupe ia, pei o le Faletupe o le Lalolagi ia ma le Faletupe o le Atinae o Asia.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Lau Afioga o le Tulafono lenei, ua mafai ai ona nono mai e le faletupe lenei ia ni tupe e faatupe ai ia atinae o le tamaoaiga aemaise lava i tulaga ia o atinae tetele, o auala, o aualalau papa ma tulaga faapena. Ua mafai ai foi e le gata ina mafai ona nono mai ia tupe ae e maua ai foi le avanoa e mafai ai ona aumai tupe faamatuu mai i le tulaga faameaalofa mai le faletupe lea o Asia e fesoasoani ai i isi vaega o le atinaeina o le tatou tamaoaiga.

O le isi itu taua o lenei feagaiga, ua mafai ai loa ona nono sao mai ma fesoasoani mai lenei faletupe i pisinisi tumaoti. Pau le mea e manaomia o le faamaonia e le Malo pe latou te taliaina pe le taliaina ia nonogatupe ia e ave sao i le itu tau pisinisi tumaoti, a o le tologiina lava o na nonogatupe, e totogi lava e pisinisi e le manaomia se tulaga e faamaonia ai e le Malo ia nei nonogatupe ae pau lava le tulaga ia faamautinoa e le Malo o se atinae tumaoti e ogatasi ma fuafuaga a le Malo mo le atinaeina o le tatou tamaoaiga ma le faatupulaia o fale faigaluega, ia a o le tologiina ma le faamauina, ia o le matafaioi lenei o pisinisi o latou o le a mafai ona faamanuiaina.

Ia o le isi vaega taua o lenei Tulafono lau Afioga, o le tuuina atu lea o aiaiga e mafai ai ona le tologia lenei faletupe ni lafoga i totonu o Samoa i le faatinoina o a latou galuega. O le faatinoina o latou suesuega ia e fai e faavae ai le latou filifiliga pe nono mai ni tupe e lagolago ai i nisi o tatou atinae tetele. Ia o ia foi faamanuiaga i le tuusaunoaina o lafoga, o lo o tutusa lelei lava foi ma aiaiga o le tatou malilie ma le Faletupe o Asia faapea le Faletupe o le Lalolagi. Pau le eseese o lo o i ai nei, ua malilie mai ia le Faletupe o Asia lea e tuu mai le faitalia i le tatou Malo pe totogi lafoga ia nisi o tagatanuu o Samoa e faigaluega mo le faletupe lenei o Asia, faafaigaluega i le tulaga foi lea faa-konesale po o le faufautua i le faletupe lea po o le Malo i le tapenaina o galuega, po o nisi o latou pe a faapea o le a faatu se ofisa o lenei faletupe i totonu o Samoa, o tagatanuu e faigaluega i totonu o lenei faletupe. O lona uiga, e pei ona masani ai, e tataua lava ona totogi lafoga a i latou tagatanuu o Samoa o lo o faigaluega i totonu o ofisa nei pei o faletupe lea e i ai nei, e ese laititi mai la i le faletupe o Asia ma le atinae o Asia ma le world bank, e i ai nisi o tatou ua tofia e faigaluega ai, o lo o i ai le tulaga e le tologia lafoga i galuega ua faafaigaluega ai. Ia atonu lava o se taimi e faafaigaluega ai nisi o tagatanuu o le tatou atunuu, ia o i ina i le taimi lenei faatoa fai ai se feutanaiga ma le faletupe pe tuu atu ai ni avanoa e le tologia ai lafoga po o le fai ai foi o le faaiuga e tataua ona totogi pea lafoga.

Lau Afioga, o le faapuupuu lenei i le mafuaaga o lenei Tulafono Tau Faaofi, o le tulaga foi lea e tali tutusa lava aiaiga ma tuutuuga e pei o tatou malie ma le ADB ma le faletupe o le lalolagi le world bank ma le faaaloalo lava. Faafetai.

FOFOGA FETALAI: Malo faafetai. Tulai mai le sui usufono mo Anoomaa Sisifo.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, ou te tulai atu e faamauina le faafetai ma le lagolago a lenei foi sui usufono ma lenei itumalo i lenei Tulafono Tau Faaofi. E maitau atu e taua tele, ma o faletupe faapenei o lo o manaomia tele e le tatou atunuu, e le gata i le Malo ae o lea foi e maitau atu o le a tatala le avanoa i kamupani, le private sector. Ua maua foi le latou avanoa e talosagaina ai ni fesoasoani po o ni nonogatupe mai lea faletupe. O lea foi la ua aumai po o le a tatou auai e fai ma sui o lea foi faalapopototoga, e ala la i le agavaa i lalo o le pasiaina o lenei Tulafono Tau Faaofi. E momoli atu ai le faamalo ma le faafetai i le Afioga i le Minisita o Tupe ma le Malo.

O tulaga ia pei ona saunoaina, o ituaiga atinae e agavaa, lea la e pei e maua i le maitau atu ma le faalogologo atu foi i le saunoaga a le Minisita, i nei lava ituaiga atinae aemaise lava le private sector. Taatia ia le Malo, aua o la e o lo o faatulaga lava e le Malo ana atinae talafeagai mo le atunuu lautele. A o kamupani la, e pau lava le fautuaga lau Afioga, e tatau lava ona silasila foi le Malo po o a ituaiga atinae e ave ai le latou... po o se tusi faamaonia e lagolago ai lena ituaiga atinae o lo o talafeagai ma le atinae o le atunuu i lenei vaitau. E pei foi ona saunoaina, o lo o maua ai galuega ma faatupulaia ai le lelei o le tatou tamaoiga. O mea ia e manaomia ia faapena ona siitia le tau o le tulaga o le soifua lelei o tatou tagata. Ae pau lava nai fesili ia ua ou tulai atu ai e fia malamalama ai lau Afioga i le Minisita, o tulaga i tului, po o le a le ituaiga tului lea e tau vaavaai atu i ai i nonogatupe faapenei, ma lona lua, pe fia le tatou first installment lea o le a totogi a o afea foi e totogi ai le tatou installment muamua. E pei o lau fesili lea lau Afioga i le Fofoga Fetalai, faafetai mo le avanoa.

FOFOGA FETALAI: Malo. Ia, se i tulai mai le isi sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga mo le avanoa. E momoli atu foi le faafetai tele i lau Afioga i le Minisita o Tupe ma le Malo i le mataala i le vaega lea. A maitau i ai i le Paeaiga na tea nei, sa oo lau faamatalaga i le tulaga lea ina ia tagai i le faaaogaina o le faletupe lea ua tulai mai le Asian Investment Bank mo ni a tatou atinae. O le mafuaaga lau Afioga, e le faaitiitia foi le faafetai ma le sao o faletupe tetele o le lalolagi o lo o tatou faipaaga pea i le taimi nei pei o le world bank ma le ADB, IMF. Peitai, e aoga tele le tatou faipaaga ma le faletupe fou lea ua tulai mai, atonu e tau faamama ai foi aiaiga ia ua aumai e isi faletupe ia mo tatou. Aua pei o lea o le a maua foi lea avanoa taua pei se faiga faatauvaga foi lea ona faigofie lava lea, e oo foi i le mama o tului, o le a pau foi i lalo. Aua o lea tatou te vaai foi i ai i vaega lea e tetele sea i totonu o le faletupe lenei, o Ausetalia le isi atunuu e aupito sili ona tele lona sea lena e i totonu o le faletupe lea. O lona uiga, o se faletupe malosi toe mautu toe mauaa. O lona uiga, faafetai tele o lea o le a faaoga e tatou e fesoasoani i le tatou atinae.

19 TESEMA 2017

Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 - faitauga faalua

E le gata foi la ia i tatou, a o lea e maua ai ma le avanoa o le aufaipisinisi ma tagata i tua. A o le mea e aupito sili ona ou fiafia ai, o le mea lea e tau o le special fund, lea e mafai ona faatupe mai faletupe nei. O lona uiga, e mafai ona aumai e faagaioioi faapisinisi foi lenei e tatou faletupe nei pei o le Development Bank ma isi NPF ma isi mea faapena e nono mai i pasene maualalo tele, ona faaoga lea e le tatou aufaipisinisi ma tatou e agavaa i ai i lea foi vaega.

I le tulaga o lafoga, ou te talitonu ia, e tatau lava ona faalaugatusa ma isi expats po o tagata foi nei lea e faigaluega i kamupani ia mai fafo ina ia taumafai ai e le gata e ogatusa ma vaega ia, a ia faafaigofie ia taumafai e faatosina mai lenei faletupe ina ia faigofie ona tatou... afai foi e talosaga mai ina ia fai se tatou sea, e manaia foi mo le agai i luma. Ia, e momoli atu ai le faafetai tele i le Minisita o Tupe aemaise o le Malo i le mataala, e avatu ai le lagolago tele i lenei faletupe taua ua aumai aua le tele o atinae a le tatou Malo. Ma le faaaloalo lava.

FOFOGA FETALAI: Malo. Ia se i avatu muamua le avanoa i le sui usufono mo le Itumalo Tu Taulaga Sisifo.

Afioga FAUMUINA ASI PAULI WAYNE FONG: E muamua ona momoli atu le faafetai tele i le Afioga i le Minisita ona o lenei Tulafono, ae maimau e pe ana vave mai le Tulafono Tau Faaofi, ae maimau e foi pe ana se i vave mai lenei bank i totonu o Samoa, ona o le tulaga lea e i ai, e le alofia foi, o le tele o pisinisi taitoatasi, ua tele ina uma ona loan i isi bank. A o le fesili aupito sili ona taua, pe mafai e lenei Faalapotopotoga o le Faletupe o Asia ona fai le refinance ina ia mafai ai ona toe o pisinisi nei i kamupani taitoatasi e mafai ona toe fai le isi loan e toe refinance ai pe a faapea lea e lelei le tului. O le fesili tele lena ina ia mafai ona fesoasoani le Afioga i le Minisita e finau la i itu ia, aua e leai se aoga o le bank ae le mafai ona loan ai se isi, e le mafai foi ona o i ai le aufaipisinisi ona ua tofua uma latou ma loans. Ae a toe maua mai se faamamaavega e toe refinance ai, oi, o le a le mea o le a tuu ai? Ia aumai ma sina pasene pe lua pasene, ou te iloa e leai se mea e afaina ai.

I le tulaga o le lafoga e totogi e tagata faigaluega o le a faamoemoe e faigaluega i i, Minisita o Lafoga, totogi le lafoga, o lea ua leai lava se isi e le totogia se lafoga e oo mai i le taimi lenei. Aua la le faatamala ai i le vaega lea, ne i te i ua aumai alofia i le tulaga lea, ae lelei ona totogi. Pe Samoa pe Samoa lua sitiseni, totogi pea le lafoga ina ia tau faamama mai ia matou ia, o lea foi e totogi lafoga a faipule, ae pei e fai lava si tetele laitiiti. Ae pe mafai ona toe tuutuu laitiiti i lalo, se i faatino ai tagata palota ia e omai i le tele o aso ma aso. Ia na pau lea lau Afioga i le Minisita o Tupe, ia manuia foi lau Afioga i le Fofoga Fetalai. Faafetai.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

FOFOGA FETALAI: Malo faafetai. Ia se i tuu atu i le Afioga i le sui usufono mo Palauli le Falefa. Tulai mai se tasi o sui usufono sinia o lea itu o le Maota.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa, faafetai foi i le Afioga i le Minisita mo le Tulafono Tau Faaofi, ma o lenei Tulafono Tau Faaofi o se Tulafono taua mo le atinae o le atunuu, e le gata i atinae a le Malo, ae faapea foi i atinae a le aufaipisinisi tumaoti.

O lea ua uma ona saunoa atu se tasi o sui usufono i le tulaga o tului, aua tasi lea vaegataua, ae ua faataua e lou sui usufono lenei avanoa ona o lo o taumafai pea tatou e atiae le tatou atunuu i le tulaga o avanoa tutusa e pei ona e saunoa i ai. I le vaavaai a lou sui usufono aemaise o le atinae o Samoa, e le o tutusa, e le o tutusa i luga o le tulaga, o lea lava e faamaonia le fai mai o tagata mai Salafai i Upolu nei ona o le leai o ni galuega i Salafai. O le ki e tatala ai le mea lea lau Afioga i le Minisita, ou te le iloa po ua faafia ona ou tautala i lenei avanoa, o le atinaeina o le taulaga fou i Salelologa, o le ki e mafai ai ona vave ona atinae o le taulaga fou, o le uafu faava o Malo i Salelologa. O le avanoa lelei lea e fai ai le uafu ina ia mafai e vaa lau oloa ma vaa laupasese turisi ona o i Savaii. O le mea lena e tau o avanoa tutusa, e tutusa ai mea e fai i Salafai ma mea e fai i Upolu nei.

O lea na tatou talanoa i tagata sulufai. Ia o lea e sulufai mai i inei tagata Savaii ona o le fia maua o aoga mo le fanau, ae le gata i lea o galuega. Afai ae mafai ona fai le uafu i Salelologa i totou o le lua tausaga o lumanai nei, o se faamanuiaga lea mo Salafai e maua ai galuega a tagata, e taugofie ai oloa e faaulufale mai totonu o Samoa ona o aseta o lo o i Salafai e maualalo e le atoa se fa miliona i le taimi lenei. A faaopoopo la le uafu e tolu i le \$40miliona, ona maua lea o le \$45miliona o le value o aseta. O tai i le uafu i Matautu, ua ova i le \$400miliona le mea la e i tai. A oo la ina fai le tau non cash transaction, e \$4miliona i tausaga taitasi. Ae afai i Savaii, o le mea lena o lea ou te fai atu ai, e taugofie le vaa oloa e alu i Savaii i lo le vaa oloa e sau i Upolu nei, ona o le tulaga lena ma ua uma foi ona fai i ai suesuega. E 25 pasene e taugofie ai oloa e faaulu i Salafai pe a fai le uafu i Salelologa. Faafetai i le Malo i lana faaiuga e siitia mai ai le Ofisa o Faamasinoga ma le Matagaluega o Leoleo.

O lea foi ua i ai le faaiuga a le Kapeneta e fausia ai le Matagaluega o Aoga, e faapea foi i le NUS i totonu o le taulaga fou i Salelologa. Faafetai. Ae le mafai ona galulue mea ia pe a leai le uafu faava o Malo. O le ki lea i totonu o atinae a le tatou Malo. Faaoga le avanoa lea e fai ai sina tatou tamai aitalafu ua lava se tolusefulu po o se fasefulu miliona e fai ai le uafu i Salelologa. O lea foi e taatia le uafu i Asau. O le uafu i Asau, e aoga mo le tuuapaina o ia. E maua foi le fa afe o galuega e maua ai. A taofiofi o tatou tagata e omai i Upolu nei, ona taufai tutusa ai lea o le aofai o Savaii i Savaii ma le aofai o Upolu i Upolu nei. O le tuualalo lea i lau Afioga i le Minsita, faafetai i le avanoa.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Faafetai foi i le avanoa o le a maua ai avanoa e atinae ai pisinisi tumaoti, aua o le tasi lea o malosiaga o le tatou atunuu ma le atinae ina ia tupu, faatupulaia, maua galuega a tagata ia toatele tagata faigaluega. Afai o le avanoa lea o le a aumai i i ona o le Tulafono lea, ia tatou viia le Atua i lona agalelei ma ana faamanuiaga.

O le isi mea e pei ona taua, o lea foi na ou taua i le tausaga talu ai po o ona tua atu, vaai faatele le... fai le airport i o i Asau, ao sousou ai le vasa i i, a o la e malu le itu le la o Savaii. E 2000 mita le umi o le malae vaalele i Asau aua o la e lelei eleele la e i ai, e land i ai le tatou vaa fou lea 737-800 o le Samoa Air po o le Samoa Airways. Na pau lava lau faitioga i le vaa lea, o le a le mea ua toe tuu i ai le niu? O le niu o le mea a le Polenisia. Sa tatau ona tuu i ai le teuila o le national flower, a o lea ua outou tuu i ai le niu ae leai ni fua. O le a tuu la i ai ae leai ni fua, ia o le mea lena e tupu, e na o le vaalele lava e alu ae leai ni fua o i ai.

FOFOGA FETALAI: Ua maea le taimi o le sui usufono....

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai. O le isi vaega taua lau Afioga i le Minisita, o lea e te taua le tulaga o tagata faigaluega, pe fai lafoga pe le fai lafoga. E leai ma se tagata... e tatau ona fai lafoga. Se i saunoa mai le Palemia.

FOFOGA FETALAI: Tulai mai lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: A afio le sui usufono e matamata i niu ia e tutu i faletalimalo, e leai uma lava ni fua o niu. Ona o le tulaga lena i le faaeteetega i te'i ua pau ifo se niu tau i se atigipoo o se turisi. E faapena uma lava i totonu o le Pasefika atoa. O le mea lena e matua faaeteete tele mea nei o tagata e fai a latou faletalimalo, e faale-fua a latou niu ona o le puipuiga o le soifuaga. O le mea foi lena e faapena ai le niu lena, e le tatau ona i ai ni fua o le niu i le vaalele, ne'i te'i ua toulu ifo niu i le au pasese.

FOFOGA FETALAI: Ia, se i tulai mai le sui usufono.

Afioga Hon FAUMUINA TIATIA FAAOLATANE LIUGA: Faafetai, o lea la ua ou malamalama i le mea e ala ai ona le fua le niu, e mo le saogalemu. E leai o le tuualalo, aua o lea e fai la tatou Teuila, sa tatau lava ona ave le national flower ae le i uma... e fai aso le Alii.

19 TESEMA 2017

Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 - faitauga faalua

O mea tau lafoga, e tatau ona silasila a faapea o le a faaoga le regional scale, ia e tatau foi ona silasila lau Afioga ma le Matagaluega i tulaga o faatulaga ai totonu o tagata i totonu lava o le tatou faaitulagi, ina ia mafai foi ona ave le avanoa tutusa i o tatou tagata. Aua o lea foi o le a taumafai ina ia faatulaga tagata faigaluega, ia faafetai o lea o le a faaopoopo foi nei white collar jobs i totonu o le tatou atunuu ona o lenei foi, o se laasaga lelei.

I le tulaga o le faaogaina o le tatou Faletupe o Atinae, e tasi lea auala e mafai ai foi ona matua faatele le capacity o le Development Bank, e latou te serve ina lo tatou atunuu aemaise lava i le motu i Salafai o lo o mai ai nai nei sui usufono, tauvalaau pea...

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Malie le sui usufono, ua maea le taimi o le sui usufono o lo o saunoa nei. E i ai se mea o finagalo i ai le sui usufono mo Faleata Sisifo?

Tofa Lealailepule Rimoni Aiafi: Lau Afioga ona o lea sa ou taua lafoga, e pei o lea ua agai mai ia te au le lauga a le sui usufono. E manatua e tasi lea sui usufono e ese lou mimita ai. Leaga foi sa fealuai ma ona shorts i aso ia o faigaluega i le UN i i nei. O lau fesili la i le sui usufono, sa totogi sau lafoga i taimi na, aua sa faigaluega i le UN? Ma le faaaloalo lava.

Afioga Hon FAUMUINA TIATIA FAAOLATANE LIUGA: O le tele ia o lau lafoga na totogi. O le faatulagaga o totogi o Malo Afaatasi, e calculate i luga o le gross ae pay i lalo o le net. O le eseese la lau Afioga i le tama o le itumalo po o le Minisita Lagolago, lea foi o le a outou toe lauga mai ia outou Tulafono. O staff assessment e ave i totonu o le UN, e tau ai le atunuu lea e te alu atu ai. E tusa o le contribution a Samoa sa ou totogia, ma matou uma sa i le Malo Afaatasi. E tau le mea lena o le staff assessment. E ave la i lalo i o i le Malo afaatasi e tusi i lalo o le Malo o Samoa. O le matou sao lena. Ae e moni e leai se tax e totogiina, ae na pay au i le net.

FOFOGA FETALAI: Malo faafetai. Ma ua maea le taimi o le sui usufono.

Afioga Hon FAUMUINA TIATIA FAAOLATANE LIUGA: O lea o le a faamaea atu. O lau fesili lau Afioga i le Minisita e ona le Tulafono, faafetai mo lenei Tulafono, po o faaoga la le tatou Development Bank e aumai ai?

Ae manaia foi pe a fai la tatou interest rate ia competitive ma mea o lo o i ai nei, ma ia maua ai le avanoa o o tatou tagata e fai ai a latou atinae. Aua a lelei le atinaeina o pisinisi tumaoti, oka le tele o galuega o le a maua ai.

Ma lou faaaloalo lava lau Afioga i le Fofoga Fetalai.

FOFOGA FETALAI: Faafetai. Se i tulai maia lau Afioga le Minisita o Tupe e saunoa ona tuu atu ai loa lea o le fesili.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Afioga Hon SILI EPA TUIOTI: Faafetai lava i sui mamalu o le Palemene sa faaalua manatu. O le tulaga muamua lava i fesili e faasolo atu, e tusa e USD\$400,000 le tatou subscription, e lima vaega o le tatou installium o le tatou totogi muamua o le \$80,000 muamua lava se i pasia le tatou Tulafono, ona ave faatasi loa lea o le tatou Tulafono ma le tatou siaki lena e \$80,000. Ae lima le vaevaega. Ae o le \$400,000 masalo o le tolu tausaga e totogi auauai atu ai, so e faigofie.

Lona lua o tulaga ia tau tului, ae e pei ona silafia i le taimi lenei tatou te le o i ai i totonu, e le o manino i le tulaga lea, pe o le a ia tului. Ae ou te talitonu e le mamao ese mai tului ia e faaoga e le Faletupe o Asia faapea le Faletupe o le World Bank. E le o matua manino i le taimi lenei le tulaga i le faatulagaina, e pei o atunuu e vaivai le tamaoiga, o latou e feololo ma latou e malolosi, e pei e fai e le World Bank ma le ADB, e fua i ai le tau o le tupe lea latou te aumai, e nono mai i lo tatou Malo.

E toe faapoopo atu lava i le tulaga lea, o le aoga foi o le faletupe lenei, ma ua mafai ona avanoa ai le nono sao mai o tupe fesoasoani mai le private sector. E pei lava ona ou taua muamua, e pau lava le mea e manaomia, pe finagalo le Malo latou te lagolagoina le faiga o le talosaga ma le tapenaina o pepa uma. O le mea lena e faia e le faletupe ma le kamupani, e le guarantee ina pe totogiina e le Malo. E pau lava le mea e tatau ona tagai le Malo, po o atinae ia e aumai ai tupe ia e o gatasi ma a tatou fuafuaga i le atinaeina o le tamaoiga ia maua ni a tatou oloa e faatau atu i fafo ma tele ni avanoa e faafaigaluega ai o tatou tagata.

O le tulaga o le totogi lafoga o tatou tagata, e pei ona taua i le Tulafono o lea e taatia mai le avanoa lena o le faaiuga lena e fai e le Malo i le taimi talafeagai aua e le mailoa pe o afea se taimi e mafai ai ona faigaluega o tatou tagata. A oo i ai i le taimi lena ona fai lea o talanoaga leaga e tatau ona mulimuli i le Tulafono a le Matagaluega o Tupe Maua, ia e le o manino i ai. O le taimi lenei, o le tele o isi faalapotopotoga nei o lea e i nei i Samoa, leaga o le toatele foi o tatou tagata e feoi ma tusifolau Niu Sila po o Ausetalia ma tulaga faapena, ae tagai i le tulaga po o fea na recruit mai ai. A faapea o le taimi lea na aumai ai le talosaga o la e nofo i Niusila, o lona uiga e tatau ona faaoga o le tagata Niusila. Ia maua ai foi le avanoa pe a faapea e aumai se quota mo tagata Samoa e faigaluega ai. Ona sau lea o le manuia i tagata Samoa ia e nonofo i totonu o le atunuu, faapoopo e maua ai avanoa faigaluega faapena.

Afioga Hon Faumuina Tiatia Faolatane Liuga: Lau Afioga i le Fofoga Fetalai o se mea e fia malamalama ai lou sui usufono.

FOFOGA FETALAI: Tulai mai le sui usufono mo Palauli le Falefa.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Afioga Hon FAUMUINA TIATIA FAAOLATANE LIUGA: Faafetai lau Afioga. Faafetai i lau Afioga i le Minisita, e faamalulu atu o le faalavelave i lau saunoaga malamalama ma le matagofie. O le tulaga lea o le faafaigaluega o le tagata mai fafo ma le tagata i totonu. E tutusa le totogi, pe totogi pea le tagata mai fafo i le totogi o fafo po o totogi i totonu o lo tatou atunuu? Faafetai.

Afioga Hon SILI EPA TUIOTI: E tali vave atu i le faafesili, e fua lava po o le a le level lea e sau ai le tagata, po o se tagata professional e umia se tulaga sinia i totonu o se faletupe i se lala iinei po o latou foi ia e clerical, e pei o le tele o galuega, e ese i latou e failautusi ese foi latou ia o professionals. E le o manino la i le taimi nei po o le a le faatulagaga o totogi o le aufaigaluega a le faletupe lenei.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, ou te le o fesili i vaega ia o support staff, o lea ou te fesili i professionals. O le mea lea e tupu a recruit tagata mai fafo, ua sau i le totogi lapoa, a faafaigaluega le tagata same job iinei, e totogi i le totogi e local. O le mea la lea e tupu o le project e tasi e mafai ona faatino e fafo e mafai foi ona faatino i totonu, ao lea o le a eseese totogi. O lau fesili la, o le a le mea o le a laititi ai le totogi o le tagata iinei e faia le same job pe a sau le tagata mai fafo, a o le galuega lava e tasi? Ma lou faaaloalo.

FOFOGA FETALAI: Ou te fautuaina le Minisita e agai le saunoaga i le mea sa laga na taua i le saunoaga a le sui usufono mamalu. O nisi fesili fou aua e te.... Se i tali i tua i o pe i ai se taimi e tali ai. Tulei la tatou galuega faamolemole.

Afioga Hon SILI EPA TUIOTI: Faafetai i lau Afioga, masalo a sailia le maliliega lea, o i ina faatoa malamalama ai ia tulaga o corporate incentives a latou, o le taimi lenei e le o manino. Sa fesiligia foi le tulaga lea faapea pe le mafai ona fesoasoani mai le faletupe lea i tulaga tau refinancing. Mo le silafia e pei o refinancing ia e pei o tulaga ia o mea o commercial banks ia e operative i totonu o le atunuu. Ao faletupe ia o faletupe faavaomalo, e manino lava tulaga e aumai ai latou e le aumaia e fai ni refinancing. O le tulaga foi lea e tele lava le galuega e fai i ai ina ia mafai ai ona justify e le faletupe. O le a le mea e aumai ai le tupe e fai ai iinei i Samoa se polokalame faapea. E i ai la tatou nonogatupe muamua lava e ave i le vaega tumaoti sa maua mai i le faletupe o Asia. O se tasi o tatou kamupani solar na faatuina, o latou na na talosaga sao latou i le faletupe o Asia, aumai ai le nonogatupe. O la la e faatupe ma totogi e latou, o lona uiga e ono maua ni avanoa e mafai ai ona tatou faaogaina, ae fua i le tulaga o le atinae pe eligible i le faatupeina i le faletupe.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 - faitauga faalua**

Sa laga le tulaga pe le mafai ona aumai vaegatupe ia i totonu o le Faletupe o le Atinae. O lo o faagasolo ia faatalatalanoaga ma le tatou faletupe tutotonu e toe tilotilo ai i le mandate a le development bank. Atonu o lo o silafia o le tele o tupe a le Faletupe o Atinae o lo o noatia i aitalafu a nisi o faletalimalo ma nisi atinae tetele. E taua uma lava le tulaga lena. Ae manaomia e le faletupe le totogi vave atu o aitalafu na e mafai ona alu atu ma faatagi e faapena foi ona fesoasoani atu i nisi. Atonu o se tulaga lea, o la e faagasolo talanoaga pe le mafai ona toe tagatagai le faletupe tutotonu, e toe vaavaai ai i se tulaga e mafai ai ona toe faatele resources ni tupe e toe tuu i totonu o le Faletupe o Atinae ina ia mafai ai ona toe fesoasoani i nisi o pisinisi e le o lava le tulaga o securities ma tulaga faapena. Masalo o le tele lava o tatou kamupani ia pisinisi tumaoti lea ua i ai nei, ua gafatia le o i commercial banks, e pei o le faalavelave e pei o lea e faalagolago lava i le tulaga o le Development Bank, ona o le tulaga e maualalo ia tului o lo o i ai. Atonu o se taimi o i luma, se i faagasolo ia talanoaga ia, ona maua ai lea o se tulaga e mafai ona tilotilo i ai. O lo o taumafai foi i le tulaga ia mafai ona maua mai ni credit lines mai fafo e toe tuu i totonu o le Faletupe o Atinae, e mafai ai ona fesoasoani i le atinaeina o le tatou vaega tumaoti.

Masalo o lo o taua le faatauaina o le atinaeina o le taulaga. E pei foi ona silafia ua i ai le Komiti a Minisita ia ua uma ona tofia. Atonu foi o nisi o outou ua asiati atu i Savaii, o la ua fai auala fou ua amata ona faata. O lo o fai foi le galuega o lo o taumafai e vaavaai i le vaevaeina o fanua lea e i ai, aua ua tele foi kamupani sa lisiina, a o le taimi lena ua le mafai ona faatino. Atonu o le isi luitau lea e i Savaii, o le tulaga e tele le galuega e toe tanu ma faagatasi ai le fanua. Masalo e talanoa atu i nisi o latou e fai lisi ma faapea e tasi lena faafitauli o lo o feagai ma i latou. Ae ua uma ona i ai le faaiuga a le Kapeneta e faasee uma mai lava ia Faalapotopotoga ma Matagaluega a le Malo mai isi vaega o Savaii, e aumai e tuu faatasi i le tatou taulaga i Salelologa, e lelei lena e faigofie ai ona o mai e maua uma ofisa o le Malo ma Faalapotopotoga e maua ai fesoasoani, ia aua ai nei toe taumafai mai iinei i Apia e fai foi sina taugata ae ia maua uma auunaga na e i ai. Ua tele foi taimi o faatu le komiti lea, ua tele foi isi lala o le Malo ua talosaga mai e fia fai o latou Ofisa, e i ai le Iunivesite o Samoa ma isi Matagaluega. Ua taumafai e le gata ina fai ofisa, a ia mafai foi ona tofia nisi sinia e mafai ona fai mataupu o lo o toai atu i ai le mamalu o le atunuu. E i ai isi Matagaluega o lo o i i Salelologa, a o le faalavelave lena e le o se ACEO, e pei na ona fai lava ma talanoa ae toe omai lava iinei i Apia e fai atu ai le faaiuga. O le fuafuaga la e le gata ina aumai Ofisa i totonu o le taulaga, fai faalelei ni fale ma tofia ai ni tagata sinia e mafai ona latou faia ni faaiuga. Ia ma le isi foi mea, po o Ianuari ea i le tausaga fou lea o le a faaoga ai le tatou tekonolosi fou ma le tele e auala mai le tatou submarine cable, ou te iloa o le a faapena ona faafaigofie ai fesoataiga a lala iinei ma Savaii, o le a faapena ona fesoasoani i ai i le tulaga lena.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 – iloiloga auiliili**

A o le tulaga i le taumafai i le taulaga, ou te masalo o lo o i ai lava i fuafuaga a le Malo lena tulaga. Masalo o la e faatoa amata nei ona faatino le tulaga ina ia faatele le mea e fesoasoani i le kamupani vaa ua leva ona taofia foi e nisi o tamalii i Salelologa, ae foliga mai o lea ua amata le galuega, talosia ia faaaauai ai pea. Ou te talitonu foi o fanua ia e i luma mai o isi kamupani tele lea e i luma o le uafu, ua tataua ona faaoga uma o le mea e tataua ona taofi e le Malo fanua ia e pito i le sami, a oo i le taimi e fai ai le tatou taulaga mo vaa tetele e mafai ai ona lau containers ma faapena mea uma, a o la e avanoa le fanua, ina ia tele negotiations ma faapea e totogi atu tupe, a o le taimi lenei, ua galulue i ai le Komiti lea e i ai. Ia, masalo lau Afioga ua maea ai fesili, a o le faletupe lenei, tusa ua faaopoopo mai foi le isi avanoa, a le maua mai le faletupe o le lalolagi, le maua mai le faletupe o Asia, ua mafai ona tatou o i le faletupe fou lea e maua mai ai fesoasoani. O lo o i ai foi le avanoa e mafai ona package se atinae e mafai ona fesoasoani uma mai ai faletupe nei e tolu. O le tulaga lena o le vaavaai po o le a le mea e faigofie ma taugofie ai, a o lea ua maua lenei avanoa e faaopoopo ai, e fesoasoani ai ia tatou i le sueina o tupe, e fesoasoani ai pea i le faatupulaia o le tatou atinae. Ma le faaaloalo lava.

Na faamaonia le lafo ma faitauina le Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 i lona faitauga faalua.

**TULAFONO TAU FAAOFI O LE FALETUPE O ASIA MO ATINAE
TETELE MA LE FAFAIGALUEGAINA O TUPE 2017
– iloiloga auiliili**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoa mo le iloiloga auiliili o le Tulafono Tau Faaofi.

E tusa ai ma Tulafono Tumau, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: O le Tulafono e noatia ai le Malo.

Faamaonia.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 – iloiloga auilili**

FUAIUPU 4: Pule Faataga e nono ai mai le Faletupe.

Faamaonia.

FUAIUPU 5: Faatinoga o noataga i lalo o maliega.

Faamaonia.

FUAIUPU 6: Faiga e foia ai finauga i le va o ni sui lautogia.

Faamaonia.

FUAIUPU 7: Tulaga o i ai o le Faletupe.

Faamaonia.

**FUAIUPU 8: Faaogaina o le Tulafono e Tulaga Aloaia ma
Puipuigamalu Tau le Va o Malo 1978.**

Faamaonia.

FUAIUPU 9: Puipuiga faaletulafono mai tualumaga faaletulafono.

Faamaonia.

FUAIUPU 10: Puipuiga faaletulafono o aseta ma faamaumauga tausi.

Faamaonia.

19 TESEMA 2017

Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 – iloiloga auiliili

FUAIUPU 11: Tulaga aloaia ma fesootaiga.

Faamaonia.

FUAIUPU 12: Puipuiga faaletulafono ma tulaga aloaia o tagata ofisa
ma le aufaigaluega.

Faamaonia.

FUAIUPU 13: Tuusaunoaga mai lafoga.

Faamaonia.

FUAIUPU 14: O isi tuusaunoaga.

Faamaonia.

FUAIUPU 15: Saolotoga o faatinoga o galuega mai faiga
faatapulaaina.

Faamaonia.

FUAIUPU 16: Faamatalaga tusitusia aloaia e tuusaunoa ai.

Faamaonia.

FUAIUPU 17: Tulafono Faatonutonu.

Faamaonia.

19 TESEMA 2017

**Tulafono Tau Faaofi o le Faletupe o Asia mo Atinae Tetele ma le
Faafaigaluegaina o Tupe 2017 – faitauga faatolu**

FUAIUPU I MA LE IGOA:

FUAIUPU 1: Igoa puupuu ma le amataga.

IGOA: Tulafono o le Faletupe o Asia mo Atinae Tetele ma le
Faafaigaluegaina o Tupe 2017.

Faamaonia.

*Na faagasolo le Tulafono Tau Faaofi o le Faletupe o Asia mo Atinae Tetele
ma le Faafaigaluegaina o Tupe 2017 e aunoa ma se Teuteuga.*

**TULAFONO TAU FAAOFI O LE FALETUPE O ASIA MO ATINAE
TETELE MA LE FAAFAIGALUEGAINA O TUPE 2017
– faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le Lafo, *Ina ia faitauina nei le Tulafono Tau Faaofi o le Faletupe o Asia mo Atinae Tetele ma le Faafaigaluegaina o Tupe 2017 i lona faitauga faatolu.*

Faaluaaina e le Minisita mo Aoga, Taaloga ma Aganuu, Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Maota.

**TULAFONO TAU FAAOFI O LE FAAFOEGA O TAALOGA ESEESE
TAU TUPE 2017 – iloiloga auiliili**

FOFOGA FETALAI: E tusa ai ma Tulafono Tumau 107, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te tulai atu e faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Faafoega o Taaloga Eseese Tau Tupe 2017 faatasi ma Teuteuga.*

Faaluaaina e le sui usufono mo Palauli le Falefa.

19 TESEMA 2017

**Tulafono Tau Faaofi o le Faafoga o Taaloga Eeseese Tau Tupe 2017
– iloiloga auiliili**

Na faamaonia le lafo.

FOFOGA FETALAI: Ia, talu ai ona o lea ua tatou toai taunuu i le tatou taimi manava mo leni aso, e manatu foi ua faaaaogagase le paia o le Palemene, ae a le Kapeneta ma le Taitai o le Malo, ona sa alausu le tatou Fonotaga i leni taeao e ala i le tou mafutaga tatalo. Ona i ai lea o le manatu, o le a tatou sailiili malosi, o le a moe le toa mo le aso a taeao, o le a faapena foi ona tatou sailiili ai le malosi aemaise foi o le tapenaga o galuega a le Fono Aoaofa Fautulafono, ae a le faatulagaga o le Aso Fono mo le aso a taeao. Ona i ai lea o le manatu, ae tatou te le i tolopo, o le a ou faaiuina le tatou Fonotaga i se tatalo.

Na motusia Felafolafoaiga ina ua tolopo Taualumaga a le Fono Aoaofa i le itula 1:00 i le aoauli seia aulia le itula e 9:00 i le taeao o le Aso Lulu, 20 Tesema 2017.